

緣督廬日記抄

綠督廬日記抄卷十

光緒十
寅金年

長洲葉昌熾著

邑僕學王季烈輯

壬寅正月

十二日午後游廠珠玉象犀為上焚銅次之精拓精鑿稀如星
鳳惟購得明顧東橋墓誌一冊文待詔撰書錢立犀金塗塔
致一本表忠觀舊刻又從正文齋揭歸毛詩名物圖說兩冊
同郡徐鼎實父輯索二金與以一元尚未首肯又在廟中見
大理名城碑較舊藏下截多題名一段與以六千文為內閣
某君捷足先得

十四日午後現詒佩鶴相繼來縱談介侯至蘭州即留駐省城
可以不赴涼州成所隴右人文樸樸風氣未開荷戈講學羔
雁爭迎可以操券但求銷去永不釋回四字則賜環有日耳

二十日作上海縣志札記序一首原書秦炳如封翁撰研詒之
尊人也

廿八日已刻樞曹王使甫易丞午王報芸段少滄公函來告奉
上諭甘肅學政著葉昌熾去欽此祇奉 恩命且漸且懼

浮湛十載二毛斑矣迢迢五千里山嶺險阻甘省遼遠僻遠
風氣未開惟恐傾越即駕車訪鳳石前輩求為先路之導相
左復訪少滄丞午並見之高定謝恩摺以明日忌辰於三十
日呈遞夜枕鐙自繕摺稿並屬印若繕後應片稿

三十日辨色登車至朝房辰刻摺下傳宣 召見軍機胡端芬
兩起即退出

二月

十八日連仲甫偕來孫太守約期求見即作函告以甫奉簡

命冰兢自矢見則可執贊則不可

廿二日潘映仲內翰去歲出京以其祖庭辛芝年丈所藏戴文節山水卷子屬題置篋中久矣今日倚枕作七絕二首

廿六日明日請訓日脯襖被至史館過前門兩車爭駕自東飛駛而來避道不及幾為所覆今年不利於行車亦奇矣

廿七日辨色即起盥沐至景運門朝房李鞠農自廣西試差回復命同日召見皆至乾清宮西偏小屋坐候樞臣雁行至與瞿子玖前輩在丹墀下立談良久樞臣退後即聞宣昌熾入對皇上問行期何日臣對云准於出月初四日出京又問從何處走臣對由火車至保定皇太后旋問在翰林院資格若干年當何館差年若干歲何省人皆據實以對慈聖旋問江蘇偏災之後收成如何民教能否相安臣對水

灾江比較重蘇松太收成尚好蘇常密邇上海風氣已開尚無仇教之事又諭到甘後與督臣和衷共濟速辦學堂臣對甘省地僻艱於轉運必需籌款多刻有用之書或先從各省書局調取皇太后即諭劉坤一張之洞盛宣懷各處皆可以咨文調取臣又奏學堂雖不可因循辦理宜有次序當先從小學堂招教習得人尤難宜先立師範學堂慈顏甚霽即命跪安禮畢趨出

三月

初四日黎明即起登程印若送至火車站甚南亦來話別臨歧惘然各致珍重辰初即開車轉瞬即踰蘆溝橋由良鄉而西未正至保定潘子靜同年清苑縣葉梨軒大令皆來相遇見於官廳行館在西關外火車站傍德安棧

初七日卯刻登程五里小汲店十里大汲店十里郭村燕郭槐
故里也又十里陘陽驛尖其地屬滿城縣漢之中山國北平
縣地也驛亭豐碑屹立捫而讀之嘉靖四年重修陘陽驛記
姚鏌撰文馮蘭書丹飯後行十五里過方順河有方順橋即
古之濡水亦即陳平所封之曲逆也臺市柳比木棉黍米之
屬羅列甚夥又十里高庚鋪屬完縣境又十里良邱則入望
都境矣又十里始至望都縣東關外旅店宿瓦釜烟坑塵羹
脫粟而已

初八日熱愈甚兩日之間易裘而裕自望都西南行十里有鋪
又二十里清風店南北皆有碣樓上供魁星像卧碑在地不
能讀又二十里清水河又十里定州宿東關外旅店屋宇稍
潔清風店已多眼藥鋪至定州城外則列肆而售者眼藥十

居五六宜乎馳名輦下也

初九日早起登程十五里至孟良橋十里明月店繁盛亞於清風相傳漢光武避王郎之難宿此難鳴而去役夫停輿稍憩又行十里至界牌鋪又十五里新樂縣宿所居庫隘直如峙堞

初十日黎明繞道進城至景義書院答張大令由南門出過沙河有長橋渡行旅水已涸惟沿岸泊有小舟一二又五里董城界牌藁境錯入驛路者十里又十五里伏城驛尖飯後行二十里至拐角鋪又十里滋水又十里正定府北關垣隍高峻望而知為河朔名城進城行四里至興隆寺宿即隋之龍藏寺也甫到寺門即望見子沂蓋臣偕來十年不見竟不相識矣上燈後知府江槐序號蘭笙來談極久年六十七矣慈

祥愷悌循吏也早涉沙河午後至曹河滋水並淺澗可經車馬幼時聞校邠先生講詩淇水湯湯漸車帷裳句及孟子濟人於漆洧節知北方之水與吾鄉迥不同垂菴之年通始目擊

十一日養疴留一日鄒沐後登大殿拜佛殿高十三丈五尺像高七丈一尺宋開寶初重鑄四壁佛像莊嚴妙麗竊極奇幻如見蓮花梵界惜已剝落下殿讀隋開皇碑摩挲三十年今日始見真面又宋碑一元碑一篋中皆有拓本唐愷則未見也午後進城答江蘭生太守未見又觀李寶臣紀功碑即風動碑在府署旁大道崇隆揭峙頂晶雕琢更奇古余吳人未見韓蘄王碑不意先見此碑也

十二日黎明力疾登程四里出南門見前明尚書梁夢龍綽楔

尚兀立道旁恐雕橋遺址荒矣五里涉滹沱河幼讀戴記范
書即向若而歎今當其淺濶殆一衣帶水耳又十里柳林鋪
又十里趙陵鋪又十里安舍鋪又十里踰海山嶺坡陀高下
畧有登降為入山之濫觴又五里即至獲鹿縣東關外旅店
宿訪本願寺佛殿下唐幢二齊肩立元遇公幢一卧於地開
元金剛經碑有廡覆之殿外有浮圖高聳塞向墜戶不能拾
級而登塔院有唐幢一已剝泐唐本願寺三門記亦在大殿
下北堂舍利塔碑則在塔院前前僅見碑文拓本今并見舍
利塔約高二尺許四面刻佛象甚古以石壘承之明日將入
山為子沂僱一夷寓子償拾金至徐溝又留一雙套車至西
安

十三日黎明力疾出獲鹿西關橋前用騾夫四人如吾鄉之行

舟但作兩行排如雁翅絳繩藍色淮陰侯祠即在城闕之內
元劉因詩嵌於壁未及下車瞻眺五里過土門口羣山邈遠
皆從馬頭轟起迷征記山有八陁井陘第五井陘縣志言古
井陘口有二西則固關東則土門即此口也八里仰字嶺已
屬井陘縣界將下嶺適新疆藩司潘少泉方伯從蘇自西來
傾蓋相逢降車互揖立談一時之久承以甘省情形頗篋相
告僕夫催發始珍重而別二里下安村一里上安村人家皆
枕山為屋又八里白石嶺即東天門上建岑樓高插雲表與
夫繚夫叫譁而上又十里下坡至嚴水村旅店尖道旁有碑
勒淮陰岸背水陣處亂流瀾瀾縱橫不絕石梁高駕多在平
地五里長岡又五里橫口又五里西河鋪亦名郝家村又五
里東窰嶺漢田叔故里又三里河東鋪距井陘縣城二里備

言一
行館於此湫隘萬塵不能容膝胡大令旋來拜以無見客地
辭之

十四日黎明力疾登程繞綿蔓水而過有大方橋橫亘兩崖已
圯其半十里至板橋卽卽有橋名長虹在路旁平地五里長
生口又五里湧峯山龍窩寺傑閣棲崖危樓架壑卽偕內子
停輿登眺又五里桃園鎮又五里界牌從此出直隸境入山
西境矣又五里踰北天門唐故關在峽內三晉鎖鑰四字高
出雲際又二里至甘洵驛因甘洵水而得名也照例在此換
馬前進又三里固關卽明之新固關守禦千戶所亦卽古之
東井陘也有副將駐防官廨民居並陡懸絕壁又多羣山為
竇槽巢陶穴頗有古風十里槐樹鋪十里固驛鋪又五里出
柏木井登西天門上嶺稍坦下嶺絕峻俯視心悸又五里宿

柏井驛旅店鑿山爲屋亭午即秉燭而後入余戲語羣僕今日如宿東華門門洞內山光排闥送青有亭翼然對簷高峙奴子往游歸云有石幢六面兩面刻柏井淮陰侯壘唐宋石柱題名十二字餘四面小字不能憶亟索拓工不可得路險亦無濟勝具交臂失之

十五日黎明出青玉峽路在深溝之底形如覆釜仰視羣峯列峙複岫迴環山毫奇瘦不可名狀山腰石室多題行人避雨處聞夏秋暴雨山泉匯注勢若建瓴往往人馬皆遭沒頂七里橋頭村又十里石門口山徑幽峭縹而曲如往而後出口則豁然開朗心曠神怡行二十里至平定州西門行館卸裝後天微雨冒雨進城答潘大令其署路高嶺之脊登院而上俯瞰井邑烟戶萬家瞭然在目儀門以內碑碣林立惜未能

詩十
六
們而讀之

十六日黎明登程道左有古廟石柱一聯上七言云陰洞石幢
微有字余意廟中必有尊勝經幢即拾級而登周覽一遍境
頗幽邃並無古刻行五里踰黑沙嶺即所謂南天門也上坡
尚坦下坡則陡絕千仞驚心動魄又五里義升驛或云驛後
有土路通州城甚平坦不知州城在絕高處無從飛越斯言
吾未敢信又十里平潭鎮十里塞魚村十里新興鎮十里測
石驛尖地屬平定孟縣借此設行館自平潭以西沙中碎石
磊磊落落不絕於湖底故又名星星灘飯後雨鼓勇適發十
里新店雨益驟十里至張靜鎮間以飛雪西風撲面寒甚十
里芹泉驛十里高家坡又十里至壽陽天將暮矣宿於東蘭
外自過芹泉驛雪雖霽道遠泥濘山坡升降輿夫踟躕而前

兩人互相扶掖有如蚩驅跋前疐後不勝其痒陷於淖者屢矣

十七日東方既明自東門入在縣署投一刺署門外右偏小屋額篆金大定鐘四字介侯嘗言之矣而未拓也十里黃門鎮十里大樹埋有墟市路高坡之脊又十里清平鎮所過烟戶甚寥寂又二十里山坡高下登降甚勞至大安驛宿其地仍屬壽陽轄適逢廟市演劇賽神商民雲集

十八日黎明發太安驛驛西有韓昌黎詩亭勒公詩於石蓋公使王庭湊時所作也旁刻安化陶文毅七古一首十里西嶺鋪十里要羅鎮有要羅山壽水所出高屬壽陽境又十五里至什貼鎮旅店尖則為榆次境矣又七里三岔口陶君侍行記云北抵太原東通燕薊西達關隴今以郵亭記里圖攷之

則東接壽陽西北至太原西南至榆次其地距太原省城六十里又八里腰店又二十里至王胡鎮住行館治餐整潔尚可下箸

十九日於黎明由王胡鎮西南行十里郭村七里榮村三里南谷村十里張慶鋪又十里永康鎮在荒店造飯馬矢填階華門如實聞開缺延榆綏通許觀察涵度自西來榆令為設供帳於此行館整潔與夫過門欲入而不知其非為我設也又十五里出榆次境為徐溝界牌又行十三里始抵徐溝縣城至西關外行館日晡進城縣署東偏為城隍廟廟東偏為儒學對署門稍偏為同戈驛同戈為洞渦之譌其最先實為同過因大涂小涂諸水合流而得名也行館有舊畫一幀色黯淡頗雅馴視其款為吳人尤求此亦鄉先哲之流落一毫芒

也

二十日於黎明自徐溝發十里高花邨又十里堯城亦名姚城
有堯廟又十里羅邨八里左瞰鋪內作左入祁縣境又八里賈
令鎮春秋時晉賈辛為祁大夫鎮鎮得名以此十里賈令河
亦名沙河鋪八里至祁縣城縣有賈令驛飯於北門行館未
刻出西門十里高城鋪又十里鄭家鋪又十里洪善村入平
遙境又十里仁內鋪又十里至平遙縣城日已斜矣縣有洪
善驛進下東門宿於行館平遙相傳為唐堯舊都其實堯都
在太原晉陽後逮平陽其始封之陶為山東定陶縣後封之
唐為直隸唐縣書闕有聞未知所據城內間間櫛比閭閻殷
填有古陶勝境坊果號煙房無所不有壯哉縣保定省會殆
不及也西商轉輸館穀天下其根本之地在此富家築室構

素渾堅牆垣高峻上聳雄堞下闢閭闔儼如城壘蓋有勇夫
重閉之義焉

廿一日黎明冒雨出上西門二十里永甯堡即橋頭邨亦名陳
邨十里田堡入介休境五里繞邨家堡而西南三里至張蘭
鎮尖古稱張難唐太宗敗宋金剛於此城堞參差居然百雉
市廛之盛亦不亞於平遙午後行二十里義安邨望見洪山
卽胡虬明沈果堂聚訟之孤岐山也五里港泉鎮十五里東
石門此四十里道路泥濘如塗塗附殆詩所謂汾沮洳耶與
夫不勝其憊自義安邨以東為董村南辛武岳家堡自港泉
鎮以西為宋丁村皆陶氏所未記又三里經漢郭有道墓饗
堂輪奐前有古槐甚巨霜皮鎮幹黛色參天尚是漢時所植
蔡中郎碑已亡有鄭谷口傳書主所募兩石尚不足當虎賁

驅車徑過二里至介休縣東門繞北郭而西至行館宿聞城
中有介之推郭林宗合祠介祠在左郭祠在右文潞公祠在
西偏皆未及瞻謁縣山在城東南二十五里南踰靈石西跨
沁源阿和墜馬傷肩不能乘明日命果成權充前站

廿二日卯刻發五里內封鋪又五里西石門十里義棠鎮左循
絳山之麓右沿汾水千巖競秀萬壑爭流頗似山陰道上十
里冷泉關水經注所稱雀鼠谷也亦為巖險有古廟踞山脊
祀漢壽亭侯十里崔家溝見民夫荷鍤開渠引汾水以灌田
又十里兩渡鎮旅店尖靈石何氏世居此鎮為望族今甘肅
藩司何壽軒前輩及潤甫同年皆以詞林起家其裘猶未墜
也人家皆在汾水之北以磚作屋楹圓而方其外謂之箍窰
碧柳當門清波環繞遠望極幽邃之致義棠鎮有橋跨汾水

之上名虹霽兩渡之西亦有長橋十一竇遙遙相對午後行
十里索洲鋪二十里水頭鎮皆依山循水又一里宿靈石縣
東關城關偏仄如室街不容車廛市荒涼人烟寥寂

廿三日今日道險為竹林雇二人與寅曦未造即首途十里至
坡底村已崎嶇不前又十里韓侯嶺汾霍之間古稱重險隋
仁壽中楊素討漢王諒引兵潛入霍山緣崖而進破其將趙
子開於此危崖千級高出雲表繹夫在前與夫在後拾級而
登邪許之聲山鳴谷應人稱韓侯嶺之險亞於四天門今過
此始知積薪居上淮陰侯祠在嶺脊傳與瞻謁明以後詩碣
如林以正德奉天胡希顏一首為最古南康謝溫山先生亦
有詩題壁廟後高塚相傳漢高自代還呂后殺韓信送其首
葬此門外有兩石像意者其為呂后與審食其亦猶兵祠之

有秦檜之夫婦數行四里至天險橋亦名郭家溝高跨深谷
旁有避雨之屋至此下坡十五里至仁義驛行館尖我馬瘠
矣我僕痛矣一車在嶺上折軸驛在亂山之中疊嶂層巖參
差掩映與巡檢署衙宇相望午後南行十里至道遠鎮上下
山坡鬱然崑崙崑崙過此為霍州界又五里白水邨十里師莊十
里周邨行土坡中兩崖如牆陡絕又二十里至霍州北關道
旁有官桑園柔條遠揚綠陰未罅過鳳樓橋橋之右有鐵牛
制作甚古其丰臨於土疑前人以此鎮汾水之汎溢進城宿
於行館

廿四日卯刻行一里半出南門霍山在城東南三十里禹貢所
謂太岳周禮所謂冀州鎮也五里至壇底村過蕨水周厲王
流羸即此又西度呂坂升降高坡若斷若接又十五里辛置

鎮又五里界牌紆迴沿山麓而上汾水在右十步一折如畫
曲屏如揭疊扇霍州趙城分界於此各建一坊相距適一里
許出霍州界一綫深溝遠進不絕兩旁土坡極峻如行隧道
道之底如出窟室之中達道窄處車不方軌日加午甫出峽
從者云十五里實則逾二十里尚強也峽外有石橋橫至為
窰子鎮又五里趙城縣進北門道旁有石碣題蘭相如故里
有坊題全國名臣四字又二里至南關行館失飯後南行十
里至王開鋪五里高低村村外有石坡甚陡下坡過國士橋
有坊題豫讓遺跡其實豫讓刺趙襄子處在太原不在此也
又五里蒲邨陶氏記石坡於蒲邨東南望箕山有峰如箕者
九霍山之南支也十里至洪洞縣縣有普潤驛城外道旁有
石幢高聳共三級每級間以佛象降輿設之其下層刻有楊

嚴倡一面有大悟大師功德幢記字當是宋金時刻後有康熙年號疑後人添刻第二層惟見尊勝陀羅尼字筆法甚工又行一里宿西關行館居民稠密百貨駢闐亞於平遙署縣事謝沛來見縷言歲歉民貧官清缺瘠詞色甚厲余即告之曰鄙人甫奉簡命冰兢自矢僕從尚知約束所有轎役雖自保定隨來並不准有長夫名目如有需索儘可隨時更換始改容遜謝甚矣當言則言不可默爾也

廿五日卯刻自北門入至縣署謝步署前大街有石幢一面列市籍姓名如點鬼簿疑磨舊刻而為之出南門行一里度澗河橋九里左壁邨又南士師邨有皋陶墓墓前有弼教明刑坊又十里楊曲鎮又十里羊解鋪有坊題羊生解處五里至天井邨停輿稍憩又行五里至韓邨為晉韓武子食邑屬臨

汾境又十里高河鎮鎮北有大橋橋下有壽平寺僅存三門
寺額無一椽矣橋在平地有五硤填其一居民即其中建屋
白板雙扉天然斗室鎮南有短碣題古高梁城東望卧虎西
望姑射十里至平陽府附郭為臨汾縣遙望有一塔巍然北
關外百堆崇隆幅輳遼闊固姑山平水間一名城也惟氣象
蕭索進城三里許一片荒郊以貢院為行館三晉使者涖平
陽校士之所也既下車劉大令來見申刺往答謝見署前兩
鉄獅制作甚古

廿六日卯正發二里出南門門內有碑題蒼頡造字處案陝西
白水有倉頡廟漢碑在焉於平陽興涉焉五里郭邨三里出
口又三里免廟村聞廟中有陶唐氏帝后像兩廡有稷契皋
陶配位舜廟在右禹廟在左遠望紅牆迤邐規制頗崇五里

大韓鋪七里耶里邨入襄陵縣界其北為金井村五里靈伯鋪停輿三義閣前閣外有方池已涸甃以磚壁上嵌新建茶亭記十里張林鋪道經兩堡一堡門題紫電口雲四字與行繞堡外而過見兩磚塔一塔八級在廢寺後圍一塔六級在平田中環以外垣自出平陽彌望荒土尚未播種村居多墻垣洞連闌其無人豈大侵之後流亡之戶猶未歸歟二里為趙曲堡稍有屋市望衡而居者數十家堡外亦有一塔四級在土坡上過鎮陽橋橋前有坊剝蝕但見人倫二字道左有三四碑未能讀又十里荆邨自此升土坡仍沿汾水而南沙渚縱橫涓流如帶囊囊可涉矣其右為笑山之麓行十里出襄陵南界入太平北界至史邨驛邨北有坊題巢由洗耳行館驛距縣二十里

廿七日卯刻發出史邨後即入一土山之峽五里解邨五里閭店邨落皆在峽盡處七里蒙亨邨三里蒙城汎蒙城之北有古義士橋亦相傳為豫讓故跡與洪洞之橋同一附會太平曲沃分界於此過此而南為曲沃境道左有文中子故里碑余平生未讀文中子攷諸新舊史及隋唐人著述亦無仲淹事跡可徵今乃過其故里甚矣人之好事也又十里新店又十里至高縣鎮尖陶君作高顯然門額字作縣余諦視甚清晰飯後行十里楊邨又十里郭馬鋪又十里至侯馬驛宿驛距曲沃縣三十里住行館驛西北十餘里翠金山有臺駘廟下為臺駘邨

廿八日卯刻發過澮水橋橋平如砥水澗為田麥苗正秀中間涓流一綫淺不容刀相傳秦人赴長城之役其妻孟姜送寒

衣經侯馬南滄河水漲難濟手拍南崖而哭滄為之淺云十里史店五里驛橋村橋旁有廢寺寺僧鵲衣乞食於道左遇鐵閘關即入山峽山路崎嶇行人魚貫而進五里隘口愈窄又五里始出峽又五里黎園邨邨外為蘭德鎮丁戌大祿壘為墟矣又五里裴柏邨遙望兩坊對峙聞一坊為裴晉公祠一坊為趙忠簡故居及至其地僅從裴坊下過上題熱高中夏四字裴氏祠堂未見當在邨以內隋之裴鏡民碑唐之裴權卿裴光庭諸碑皆在此惜未能登堂而徧讀之又五里間店稍有市廛又十里至上東鎮荒店尖鎮西有浮圖頂已圯僅存六級市盡處有太白樓樓之東有東鎮書院行轅與書院相對特門雖設而常關非其人無從窺其美富午後行五里至川口涑水所經沮洳縱橫有三車陷於渾又五里馮家

莊又五里丁店村又五里儀張村有碑題晉郭璞讀書處又三里李家莊自丁店以下僅據窩鋪題壁記之實無居民一家也又七里至聞喜縣東關外涑川驛住行館今之曲沃古之新田也今之聞喜古之曲沃也漢武帝經此聞南粵平始置聞喜縣

廿九日五鼓即秉燭而興登輿天甫辨色自聞喜東門入出西門有長橋題涑水關鍵四字十里宋店十里郭店望中條諸峯一鱗半爪湧現雲際五里入夏縣界十五里水頭即涑水鎮距夏縣三十里雖有行館不設供帳在旅店尖飯後出鎮渡石橋橋下有司馬溫公故里碑行十里岔口其南為運城河東鹽運使所駐之地左傳所稱郇瑕氏之地沃饒而近鹽者也大風怒號輿中岌岌如聞波濤澎湃聲十里升坡為范

王邨入安邑界又十里將軍廟皆小有市廛停輿稍憩風漸
息又十里張邨又十里北相驛一名相里鎮距安邑縣三十
里住行館平陽彌望曠野棄而不耕自聞喜而西碧浪翻畦
油油萬頃正麥苗摧秀時也天時地理何以不齊抑人力有
未盡歟自入晉境見道旁有古樹村民輒解香祈禱撮土為
爐翦布作幡甚矣晉人之好機也三尺短碣非某公祖德政
碑即某夫子教澤碑有一石為其岳父妣所立追慕碑又一
石為外祖母立遺愛碑甚矣晉人之好談也

三十日卯刻發十里喬陽邨五里東朝邨為猗氏界安邑猗氏
之間千樹素綠葉成陰尚未結子十五里牛杜鎮尖於旅店
飯後行五里香樂鎮東口有千佛寺寺右為育嬰堂任師之
風三晉所罕不意十室之邑見之其西有聖母廟又有四聖

祠三官廟居民不過十餘家佛老之宮居其半十五里祁任
邨五里水頭塘瀕涑水騎氏臨晉分界於此十五里樊橋驛
相傳為唐詩人司空表聖故里臨晉縣在西北十五里住行
館

四月

初一日昨舍館定後大風松濤撼壁鞭路有聲黃昏始漸息今
晨卯刻發十里椿陽鋪十里七級鎮又十里古城屯為永濟
縣界或云古解梁也天驟雨電即止二里信昌鎮土人呼為
裴堡頭又訛為白坡頭歧路甚多屢問訊而後達失於荒店
土室三間僅如豚柵階下即為芻秣之地澆溺當門不堪駕
通匆匆烙餅果腹即促輿夫行十里高市十五里呂芝鎮停
輿稍憩又行十五里為城底鎮將至兩旁高坡對峙古柏參

天出峽有坊題有虞故都過坊下即為行館蒲州府城在鎮西五里附郭永濟縣古蒲版也中條山在府東南十五里自安邑聞喜逶迤而西隨地異名行館正對土山山上有普救寺一塔巍然在寺後共十三級奴子往訪得元碑二石一至元二十二年河中府十方普救禪寺記後有資善大夫江淮等處行中書省公丞汪泐其名當是撰書人一至元三十年正月前有達魯花赤字名已泐下有疏字年月下有官印又一碑為臨濟正宗普救寺下院記後列寺僧名有涵空如海又有鐵筆王德成當是刻字人年月泐據云塔嘉靖時重修多明刻

初二日卯刻發五里澗頭溝遙望蒲州郡城雄傑參差所經之地麥浪翻畦間以雜樹蔥蘢可愛惟城外一片荒原有如大

漢又五里薛家巖七里韓楊鎮五里辛店十五里上源頭備
雷首山北麓迤邐而西八里常旺七里至匿河鎮旅店尖即
舜所漁雷首之澤也飯後行十五里升坡而下大河前橫即
為風陵渡秦晉以河為界劉昫樂史以風陵為女媧墓或云
風后所葬今路旁有風后廟水經注引戴延之之說以為風
堤自平定州界牌至此行山西境共一千四百二十八里潼
關因河為池塹山為塹形勢天然古今以為扼塞宜矣陝西
設風陵渡巡檢主船政渡船五六艘分濟行旅其船頭腹平
底以木為篙致乎中流之後逆水而西舟人皆裹水拉繆一
牛鳴地曲折循流水激如箭行一時許始達彼岸文武官迎
於官廳畧叙即進城至行館館後枕鳳山之麓周觀察忠協
鎮趙司馬均來見送客後即出答拜縣署在學宮之右對門

有金靈古寺

初三日卯刻出潼關文武官送於西門外北枕大河南望華山
在雲霧中若隱若現山之前一土山障之若覆棋然階級層
疊不僅一成而三成英也六里滿城鋪卽爲華陰縣界五
里楊橋鋪過漢太尉楊震墓有四知坊土牆圍之遙望鵲吻
似有饗堂清泉汨汨流吠澮間卽水經注之泥城水也十里
泉店鋪東南爲瑞村原靈應泉出焉十里楊花鋪其南有蒲
谷山蒲谷水出焉仙掌一峰高插青冥遠望絕壁如墻不可
梯接諸峯若斷若續皆在其下適大風揚砂閉置輿中隔帷
遠眺如墮五里霧循山行五里至華岳廟視晷影尚未午卽
至廟中行館今日適逢廟市百貨駢闐士女雜沓甚異塵上
午後偕蓋臣子沂入廟瞻眺規模宏麗宛若帝居四面繞以

城垣百雉回環儼然壯縣松栝輪囷森然成列大至十圍參
天黛色皆數百年物也入金城門進石關為灝靈殿其正殿
也階下有兩石人朝冠執笏廣庭左右列奉朝祭告之碑數
十兩廡為山峪諸神祠再進過二石坊一曰少嶧之都一曰
籌收之府左有放生池池中有石臺石梁跨其左其北為清
漪亭再進為萬壽閣共四層登其半正與仙掌峯相對羣峰
列峙如登閭風之顛萬象在旁天風怒號不覺神眩拾級而
下道人留小憩鳩形鵲面鶴衣百結餐霞御氣去尸解不遠
矣出華山圖指點入山之路南峯最高處為落雁峯仰天池
稍下則老君煉丹處東峯即仙掌也據云至回心石即徑路
絕遊者置布袋中扶鐵柱昇而升雖不能至心嚮往之惟自
憾無濟勝之具而已右轉至城隅東偏有小亭翼然臨其上

望麥浪千畦向風而靡再進小殿三楹中供明太祖夢遊西
岳記崇禎中立後有巡按御史吳姓陝西右布政使張維世
姓名刻於屏黑文朱地筆勢遒嚴鸞翔鵠峙明重刻漢華山
碑及周天和趙文淵碑唐咸亨碑呂向述聖頌顏魯公
金天王祠記及唐宋題名幢刻皆未見據奴子云在殿廡道
人以碑目呈購得題名全分共七十餘通視趙德甫著錄十
不存三四矣直一千五百

初四日辰初始發四里過東平橋進華陰縣東門為潼津驛亦
有行館在縣署右偏不駐廟中即駐此一里出西門過驢馬
橋下為西河即長澗水源出蓮峰水簾洞北流入渭十里長
城橋十里新莊鋪五里班家莊又五里至敷水鎮行館尖自
畿輔入晉二千餘里尖站皆自備資斧然一路所見有為前

冀甯道而設者有為新疆藩司而設者不一律也中途供帳始見於此飯後遇臺頭村為分界鋪計十五里東為華陰界西為華州界五里柳子鋪東有迎仙橋下為構峪河又五里蓮花池又五里羅文鋪羅文河出小敷峪八里太平橋下為潭峪水並北流入渭自柳子鋪以西田中罌粟花正開紅紫紛披在麥隴中不啻嘉禾之雜狼莠過蓮花池徑稍仄道旁磊磊皆碎石有蓮花寺已為堙矣陶君謂少華山東麓有黨氏水莊郭宗昌別墅曰沁園擅平泉之勝今不知所在矣余謂此十里中古剎荒烟平田喬木奇礪當路幽徑通泉點綴天然絕妙園林之景何必黨莊與沁園哉又行二里至華州華山驛有新舊兩城舊城明嘉靖間所築新城築於同治間也自舊城之東門進城西行折南一里進新城北門門內即

為行館

初五日聞今日祇行五十里起稍晏辰刻始發順道至州署謝步唐李元諒琳功昭德頌巍然在儀門之內出新城西門二里至舊西關市集在此店鋪林立十里石橋鋪水經注所謂東石橋水一稱沈水者也五里遇仙河有遇仙橋水經注所稱西石橋水也俗稱仙石橋轉展訛為遇仙橋五里至赤水鎮頗有廛市稍憩即西行鎮西有短碣題宋寇萊公故里又渡一長橋即為渭南縣界有坊題渭邑重鎮四字十三里新安鋪亦名程家塘據地志鋪東有橋跨東陽谷水上為東陽橋自此行五里有西陽橋跨西陽谷水上二水皆北入渭又二里明光橋導者趨捷徑皆非輾達所經循渭水升高坡坡之上有文昌閣即望見渭南麓譙進城至行館

初六日黎明起即發一里出襟滿門度萬里橋滴水在其下人
烟輻輳土人稱為小江南十里胡村鋪經一廢剎門外疊碑
揭峙有兩碑左右扶之制稍殺遠望筆跡飛舞翩若驚鴻矯
若游龍急停輿讀之天啟三年重修三聖寺記雖明刻不在
懷仁大雅下兩小碑似邦人頌其長官者亦道麓可愛五里
仰天坡自此至杜仁鋪成店坡零陽鋪零口塘相距皆五里
過塘又五里為零口鎮入臨潼縣界鎮東一高坡升坡即行
館縣令建紀綱授餐於此飯後行十里戲河鋪水經注戲水
出驪山馮公谷東北徑驪戎城東北注渭國語幽王滅於戲
即此循驪山北麓十里新豐鎮新豐河在其西即市谷水一
名玉橋河過橋行十里陰盤鋪又十里過臨水橋未至三里有三里
橋至臨潼縣東北門為新豐驛進城行一里出南門又一里

過大地陽春坊至環園行館行館在驛山之麓面山為屋引水為池煥館涼臺修廊曲榭望之如小李將軍金碧山水發纖穠於簡古 兩宮西幸修繕方新甫下與即偕內子循覽一周為說開天遺事並舉杜牧阿房宮賦以告之溫泉一大泓廣半畝許甃磚為屋如城闕上建小樓以覆之從者皆浴於此臥室西偏別有一小方沼備使臣浴所解衣磅礴一洗塵鞅初入池微逡巡有寒色漸而和煦漸而蒸然汗出褰裳出浴不覺身之輕也宋楊方平書張說溫泉箴元豐雙阜美行及元符以下題名詩刻即嵌浴室外壁間大池之壁亦有古刻十餘通在極深處非鳧水不能拓驪山絕頂高七里餘樵徑一線菟豎循之而上自檐下望之厯厯可見

初七日臥室下有溫泉極煖晨起徘徊湯池側水面熱氣蒸然

上似雲霧濶浮一里進臨潼南門答謝黃大令縣署枕山自
外至內堂塗皆拾級而升出西門過澧水黃大令送於三里
橋五里七里橋三里斜口鎮五里地窩子自此西至灊水皆
曰銅人原五里邵平莊入咸甯界又五里豁口村又五里灊
水遠望長流澆灊灊橋橫卧其上約長一里餘橋實密排如
梯甃石為梁寬平如砥漢橋在北隋橋在南唐以下今橋道
光時始建渡橋即抵行館咸長兩縣遺僕治餐以待館門對
白鹿原天然屏障飯後行十里過灊橋修不及灊橋十之一
古之灊水即今藍田之輞川也今之灊水水經注所稱長水
亦即荆溪水也又六里金花落二里進西安東郭門自東門
大街過鐘樓在舊城中繞滿城而南共八里始抵行館日曠署
西安府張碧臣前輩筠來久談握手殷殷如舊識且以史館

保案一再申謝余始恍然憶尺素曾通固吾故人也甚矣毫
而健忘也甘省按制軍派戈什哈賚文隨巡捕王際雲甘肅試用
縣丞號晴嵐送前任吳經才學使至陝送舊即以迎新經才
浙江餘姚人至此候鄙人不及留一函而去舊令尹之政惠以告新令尹
蕭規曹隨有導師矣

初八日晨起拜客先見升中丞署臬司嚴金清號紫江蘇同鄉
兼理營務處即寓撫轅之左以操場廳事為會客之所年六
十餘矣在新疆從戎三十年據鞍矍鑠操鄉音甚熟繼拜藩
司樊雲門前輩增祥談極久各言衰狀嘖嘖稱沈淇泉吳經
才兩君之英妙則鄙人之老態可知廳壁畫幅有周荃花卉
吳駿公山水皆吾吳人也周介人其畫不易得徐俟齋山水
亦致佳又答張碧臣前輩及咸長兩縣皆未見歸途至西安

府學碑林瞻仰兩學官出過一老龍鍾不以筋力為禮辭而獨遊循覽開成石經及唐宋諸碑皆司空見慣搨匠段某在側即指唐碑陰宋金刻數通囑其推拓殘幢三四段卧地土花斑駁不能辨年月無從知舊筭有無祇能舍旃日晡段估送拓本來留新拓宋金碑六通唐幢一通價一金福建無垢淨光禪師塔銘索四金予以一金竟不售

初九日保定驛馱僅雇至西安換雇三馱並為蓋臣叔姪雇驛轎一乘共八十金辰刻登程行四里出安定門陝之西門亦即唐皇城西垣順義門地也二里半西郭門通北有馮少墟先生祠五里索聖寺唐之波斯胡寺今俗名金勝寺即景教流行碑所在也十里亭子鋪五里三橋鎮行館飯胡大令所備也秦阿房宮故址在鎮西南十里漢未央宮在東北五里

飯後行五里泗池鋪五里新店子過此為咸陽縣界五里鋪
灘鋪七里豐橋長十餘丈三里河南街渭河之南也又半里
至渭水之濱俗傳為文王造舟處夏潦未漲寬不及半里許
截流而渡溜平水淺俄頃即達南岸舟平而方宛若結筏咸
陽瀕渭為城與潼關形勢相仿但不枕山耳進南門渭水驛
抵行館閤即鈔知鳳石與張治秋前輩皆實穿黃馬褂異數
也在吾蘇同光以後尤僅見行館壁間有嘉靖陳其學裴紳
順治楊時薦康熙王清賢詩刻共三石

初十日卯刻出咸陽西北門罌粟花開極盛皆深紫色望之如
荼如火十五里上照塘十里雙照鋪據地志如此上雙一聲
之轉頗疑塘鋪同名載筆者不諳鄉音故因而致誤五里西
程邨又五里界牌過此為興平縣境又五里店張街設饌於

行館飯後微雨灑塵行十里晏邨鋪為醴泉縣界風力漸通
廉纖作響又十里雄邨鋪雨縣放輿從衣裝皆沾濕狼狽行
十里抵醴泉縣城進南門以峻峯書院為行館甚壯隘知唐
昭陵離此尚五十里陪葬諸碑皆在焉平生所心摹手追至
此而不得一遊山靈其笑我矣

十一日辰正纔發行二里泥河遇此即乾州界三里孝義邨若
趨大道又三里為三十里鋪西堡八里陳村四里楊洪廟六
里好時邨新堡北魏好時地也西北有老堡秦漢之好時縣
也又四里安駕寺導者舍而趨小路所經平時彌望未見墟
市將近城始見一廢剎碑趺在地殆所謂安駕寺耶又四里
進乾州東門乾州為直隸州領武功永壽二邑行館方興版
築借住貢院西院壁間有石刻東郡祁光宗伯裕五律兩首

前有閔春忽傳恩旨貸兩縣令喜動心聲當為前學使者月
日上無紀年亦不知為何事也昨在醴泉水極苦思渴未飲
今日到此得井水鹽味稍減已如飲醍醐矣聞前途永壽邵
州皆飲窖水天雨時窖窖中渾濁如泥苦澀如肉不堪入口
命行囊汲水置驢背以解渴

勸學詞 石刻在大堂壁間

庭前有嘉樹挺挺發華枝雨露潤復久遂成棟梁姿鳳鳥翔
千仞鯢魚擊天池尺水非所止下里安可棲聲宏繇實大物
理盡如斯質厚功無薄敬業在孜孜所以勵志士常恐寸陰
馳永懷劉子闇長下董生帷文賁行彌朴古稽今與居風尚
亦云遠周情並孔思倬雲麗天藻鴻漸及芳時嗟歎我髦士
晨夕共心期

三秦學使吳門陸德元撰

十二日卯刻發二里出北門七里過乾陵南路東為金家堡路西為陵前邨九里十八里鋪十里陽峪鎮十五里安家宮過此為永壽縣界又五里監軍鎮飯於行館鎮外貧民穴土而居密如蜂房午後行十里永壽鎮後周縣治也十里蒿店七里莫營關又十三里抵永壽縣城將至道旁有舊刹佛象尚莊嚴聲聲琅然一老人頂盞求檀施呼從者以錢一掬與之城外有忠靖營一哨列隊出迎知縣事陳貽香迎於東關外復見於行館其第三子名鼎在甘省以縣令需次談次為先容舐犢之愛天下共之如鄙人之無可舐則亦已耳稍憩即進城答拜斗大山城自東至西不及一里據陳大令云城中居民僅六十餘家耳行館在武陵山岡其上曰文筆峯後倚佛剎前有塔七級已到落路山巔昨聞山中多狼村民不敢

露宿今日所行八十餘里自乾州北門即入土峽窮然而深隘不容車出峽豁然開朗一山迎面而起如屏幃如几案其形極精長極平坦漸行漸近又入峽漸升漸高又出峽峽外一重平地一重山依然前境遠望尚有坳垤及登其顛則田疇寬廣實陂陂之高原而非山也乾州為威勝驛永壽為永安驛

十三日卯刻發進永壽南門出北門彈丸小邑而學舍路北城高阜宮牆巍煥頗不庳隘知司牧者非俗吏矣甫出城閭疊嶂層嵐已在馬首涉彼崔嵬陡崖壁立五里登分水嶺憑高遠眺四面羣山橫峙山坳間有麥田碧如繡蜀自此盤回而上山徑螺旋如繞榜棹圓子又如蟻旋磨上共十五里土人謂之徐家車圓以其旋轉似輪也其實嶺上皆高阜圓若覆

孟銳若撐筴繞之而過山麓或左或右皆一面倚壁一面下臨深澗上嶺迂曲由漸而升下嶺絕陡十里為底窖溝一稱接角溝將至嶺下勢尤峻絕車馬不能直駛開路作巾摺彎折旋而下溝中流泉交錯亂石如麻在高處開車行其上繞繞有聲五里石坡坎一名十八坎輪蹄尤視為畏途自乾州以南皆土山今日山徑始見葦礪兩崖土壁內含卵石大小方圓不一道旁見巨石如覆屋尚帶土質中間亦嵌雜色卵石斑駁可愛屋壁有滄綠色者或作赭色澗石有如瓦者有如林者廣平可以憩息又五里秦峪鎮屬鄆州界設饌於行館飯後升坡十里為秦峪胡同始入峽窄而陡愈上愈平曠又十里為十里鋪又十里抵鄆州南門自秦峪升坡二十餘里皆在高原之上有田有廬下坡即為州城矣既抵行館知

今年秦中大稔而此間尚禱雨蓋聞境皆山無溝洫之利也
城方十一里有奇不為小而烟戶寥寥曠地居十之三州東
十里有姜嫄墓公劉墓則在州東八十里

十四日卯刻發二里出西門文武皆送於郭外五里火石嘴五
里水簾洞峯腰鑿穴而居者舒雁行列皆在絕陡處一髮沙
徑白無草痕尚可辨其出入之蹊有一家門首懸長梯逾二
十級甚窄而陡遠望似戰陣之雲梯叢林正綠纔得可愛不
啻萬株間以梨柿過此循湍水之東清流作深碧色兩岸羣
山迴抱流泉涓涓不絕殊有幽趣十里遊大佛寺即唐尉遲
敬德所建慶壽寺也內尚有郭公生祠大石佛高八丈五尺
跌座蓮臺鑿壁為龕深廣如巨屋左右兩佛列侍法身較大
佛不及半壁間鑿佛龕無數右壁有宋宋京宏父七律臺首

登閣瞻眺大殿三間大佛從下而起上穿閣頂高及梁際與
龍藏寺大佛正同閣之兩旁皆石室造象左室有武周長安
石刻二通亦有宋元刻右室宋人題名甚多約畧諦視筆勢
飛舞鋒穎如新龍之上下左右皆有題字左室有蓮花赤
及奧魯勸農等字又有裝塑字當是元人重修題名猶憶在
羊城時憲齋前輩亦以督學關廐時錄存副本見贈尚不及
所見之半惜無復推如入寶山空手回又為俗僧敗興意在
檀施堅詣入室不能暢其游瞻僧居甚窄亦於高處開窰洞
陡壁鑿足跡三四上懸鐵絙又一處以木格植巖腹皆藉以
攀援而登其實高不過數丈置一梯足矣不知何以以身試
險也遠西道險曰打兒嘴又西漸高曰石板坡左倚峭壁右
距漫水不容兩車俯視心回皇而不怡十五里安化鋪又五

里出峽為黑水黑水即宜祿水亦即職方之泃水也澄澈如鏡淺處水僅及膝車馬亂流而濟有一小舟方平如木筏渡兩與登岸即為長武之倂口鎮在行館飯蓋邠州長武以黑水為界也午後升坡即為廣武原寬廣平坦南北相距一百二十里界連兩省約行三四里在兩坡缺口正渡一土橋旋風如車輪扶搖而下驚砂亂飛下臨絕澗與人不能駐足不能張目幾幾隨風飛去十五里黑莊鋪五里二套嶺就樹陰納涼少頃而後行五里冉店塘堡出堡兩屋隔絕左右皆深潭築土為橋繚以短垣已頽敗八里七里鋪又七里抵長武縣城行館即在縣署中右偏

十五日寅初即發出西門過十里鋪五里洪家鋪十里白楊坡過此即入甘肅涇州界共行陝境七百三十五里五里窰店

又五里張邨鋪又五里東高莊又五里瓦雲驛署涇州事張
延篤出城六十里遠接先在行館畧談飯後行五里賀藍墩
又五里胡家園又五里高家凹所經接壤之地惟窯店及此
頗有市廛錢幌子與酒旆皆用深黃色氣象即與陝境迥別
又五里通南莊自此行二十里每十里為一鋪又行十里每
五里為一鋪共三十里為太平關長武原一百二十里至此
始盡自關口下坡旁有天鏡筆峯諸山二里鳳翔口壹里七
里台距城七里抵涇州州城正在坡麓以貢院為行館在東
關外規模頗宏敞轉勝於秦晉

十六日卯刻發進涇州南門二里出北門即泃水與夫寨寨以
涉王司馬送於回山王母宮前山距城二里下圓上銳峭壁
飛空掛然進舉相傳為周穆漢武所游降王母處峰頂尚有

瑤池鑿山壁為神龕遙望飛閣流丹下臨無地憶中有宋上官必篆書王母宮頌惜未能登而讀之自此過五里鋪二里任家溝三里小白邨即北十里鋪十五里墩之前一里為焦家溝又二里豆家山三里傅家鋪即北二十里鋪三里秋坪三里相家溝三里至王邨行館山腰古剎亦有樓閣張利史又遠送至此久拔而別出邨一里即三十里墩又三里余家溝二里百泉溝五里土垢鋪二里杜家溝二里下八里塢三里上八里塢又三里花家寨有汎兵出接又三里羊圈溝三里張家什字四里十里鋪五里王家溝二里為三里墩過墩三里即抵白水驛堡屬平涼縣界知平涼縣事高光斗連接至此既見即屬其函致前站敬謝郊迎左文襄治軍陝甘時自陝之長武西至肅州二千餘里驛路皆栽白楊昨在長武

日中即受其蔭然為飢民翦伐過半關處已不勝煩熱自過
涇州一路濃陰如帳清風徐來聞西行樹愈密真甘棠之遺
愛也

十七日卯刻發二里鄭家莊三里打虎嘴五里馬道鋪即六十
里墩因馬逆河而得名也又五里王家寨又五里郝峴鎮四
里馮家墩三里馬尾溝又三里四十里鋪在行館飯後行三
里洪溝二里胡老溝五里三十里鋪又五里東甲積峪以管
巖如熊耳之積甲也十里朱家峪五里烟霧溝二里過十里
鋪又八里即抵平涼府東關二里過清平橋進東門又二里
住貢院額曰空同使節府縣及兩教官以次來見談學堂事
羅太守云崧制軍已單銜出奏滿紙空談毫無實際及以疏
稿見示深以不列名為幸自入甘境吏治戎政皆不逮陝遠

甚學堂之不能辨早知之矣今日所行七十餘里皆左沿山麓右眺湮水湮之北岸亦皆層峯不斷間以平時神怡心曠途中作觀風示自晉即屬稿至今日始畢三省一文適於研京鍊都矣

十八日天氣驟涼御重棉尚不溫由八里鋪而十里鋪而二十里鋪十里鋪亦名崖灣子二十里鋪亦名李家峽二里貢河子三里貢河塘崆峒東峯即在南山缺處晚霧未散若隱若現羣峯迎面而起山徑漸隘行五里三十里鋪又五里乾掌溝亦名陽窪坵口又五里安國鎮在行館飯午後行十里白楊邨五里薛家灣亦名荳麻灣入固原界又五里清水溝門又五里蒿店下坡為瓦亭峽即古彈箏峽寰宇記引水經注云湮水逕都盧山內有彈箏之聲即此地也自過白楊邨羣

山起伏路隨岑轉如龍如馬如獅如象或豬或綠或蟹或黃
霧散煙收雲蒸霞駁澗底雜樹叢生山腰野花亂發天然奇
麗目不給賞又五里蕭關口一名金佛峽明嘉靖中築城峽
口今蕩為榛蕪矣斷甃頽垣尚存約畧下坡有關侯廟設茶
尖於此登殿瞻拜兩廡右祀楊六郎左祀楊七郎楊延昭足
跡未嘗度甃又安得有七郎那里人以蕭關口訛為三關口
又以小說鎮守三關附會之殊可笑稍憇出廟陟壁即在馬
首流泉如琴筑之聲跳波濺沫淙淙不絕壁上泐峭壁奔流
及山水清音字巖實有佛象過此山徑更幽邃遠望羣山環
抱無路可通及至則窄徑一線在山峽中逶迤而西升降坡
陀泉聲不斷愈轉愈深愈深愈窄峰腰怪石磴礪列峙或如
斧劈或如劍削山水之奇得未曾有山麓石膚深黑滲漉上

浮山川見英無過而問者可慨也行十里至上清水溝始有居民結廬山麓土牆茅舍點綴入畫由此而西山勢畧平故十里至瓦亭驛義塾師徒出迎童子十人雖緇袍芒屨舉止安詳彬彬有禮喜而降輿勞之並犒以筆墨資四千管帶忠武左旂參將陳正魁管帶陝提防軍左旂參將張占魁帶隊出迎固原州吏目黃榮甲自州城八十里遠來迎於驛外忠武營隊伍整肅士馬飽騰到甘來所僅見自過白水兩日尖宿皆在萬山之中行館四面皆山氣候寒如深秋

十九日朝曦透寒氣尚未做出驛南門二里折而西南望見六盤山峭壁千仞高插青冥列嶂四圍頓迷蹊徑由漸上升行十三里至合上鋪亦名和尚鋪為入山之初級始見一徑斜迤而上盤旋曲折如迷八陣圖古人謂之絡盤道言如紡車

之輪轉也洪稚存伊犁日記誤作樂蟠今方志皆作六字然實不止於六盤十里登第五盤指有平地名廟兒坪有武廟設茶尖於此稍憩又行五里至第八盤已登峯頂為固原隆德交界與中遠眺如登閬風之巔萬象在下昨所經彈箏諸峽排列如矮牆瓦亭堡則如一拳石旭日當空天無片雲狂風所激淡無晶光穿棉衣四襲尚不溫始知五月披裘之說為不虛也峯頂有巖關題龍干鎖鑰四字由此下坡共十九曲始抵山麓下視隆德諸山映日如赭山谷中野花亂發有叢生青莖如書帶草開紫色花甚幽豔又一種一莖一花攢簇如繁星中絳邊白像人又為余折一枝絕似玫瑰花但嗅之不香耳十里至楊家店五里為十里鋪又五里賀貴鋪舊有防營今已遣撤幕有烏矣又五里道隆德縣東門抵行館

見秦大令馬廣文午後往謝步

二十日早起發隆德於西門外折而北沿山行三里長把溝又三里山石灣二里得勝鋪距城八里故亦曰八里鋪六里金家溝又六里小河子墩一名紅心鋪即二十里鋪五里過一小鎮靜甯插花界亦名小河子五里沙塘鋪十里龐家鋪五里至神林堡次秦大令遠送至此在行館飯後行六里王家堡微雨即霽四里趙林店五里亂柴鋪六里黃岩兒四里司家河過此為靜甯州界七里上峽口至此登坡路稍曲三里平家河五里萬福橋又五里抵東山出土峽為李家店自平家河以西兩面皆山循右麓行一面三峯鼎峙中開一門如隘巷迤邐而西山勢益高益陡峻嶒怪醜齧缺如牆一面平列如屏障皆土山也然山麓時露石根深黑如炭蓋爾雅所

謂石戴土矣中隔一澗窄處可躍而過黏埴如污泥淺流似
傳潦又三里抵靜甯州進東門至行館

廿一日早起發靜甯州出城西門即微雨甫里餘雨頗驟三里
長原河出固原西須彌山俗名苦水水僅及膝輿夫褰裳僅
渡過河後土山邐迤不斷過八里鋪即登坡七里官道岔十
里鄧家灣五里孫家溝又五里七里鋪以距高家堡七里也
既抵堡即有行館稍憩所經之路隴阪崎嶇高坡皆罕折旋
升降不出山中古人謂隴阪九迴良不誣也飯後行十里王
家河畧有民舍土牆矮屋當年不見炊煙由此下小坡度石
橋五里為石嘴嶺前後土山惟上嶺十餘步有石磴磴名不
愧實十里罐子峽入會甯界有廢壘十三里清水河五里倒
回溝兩崖斷處皆有土橋澗水涸濁如泥薪巖瀑布挾沙直

瀉而下亦與潭流無異徒有清水之名耳又五里抵青家峽宿驛館庫陋築土為案見所未見其餘牆壁階砌亦無不以土臥室僅開一竇天陰闇如長夜

廿二日雨霽日光微遠自青家驛入山六里尚家灣跬步數曲輿夫足轉如旋風為之目眩循山左麓二里賈家坡又二里大山川升一陡峽登坡尚不甚峻下坡則俯視崔嵬百步一折數折而後下復循右麓十里太平店十五里馬家溝十里至翟家所行館館牆之外羣峯高壓排闥即見飯後曲折升坡行六里董家溝三里天成堡又三里土地廟廟外有碑四築亭覆之石尚新未下積十二里張成堡兩山之間尚有平原頗寬廣為山洪所蓄或闢為門或空如竇方圓平銳與亂石無異尤奇者一銳而上轟宛如石筍一橢圓而長頂微禿

四圍截壘似有階級宛然一浮圖形其實皆土也下坡入會甯溝俗名七十二道脚不乾地泥淖縱橫泉流如織車行澗底人馬皆行高坡之上每當坡盡處仍絕流而渡惴惴時憂陷淖前人謂澗中土赤陶君謂絕壁崩塌改陡為斜改斜為陡赤砂黃土互相隱見以今驗之山根皆作赤色山洪所注泥雷一線下垂有如屋漏痕其上皆常土也五里尚家營十五里登三里坡亦高峻下坡始出溝穴又三里抵會甯縣南關近城諸山石壁有通赤者有巍然卓立整齊堅緻儼如雉堞者有四方平正如墩臺者皆出天然今日先後度土橋七皆在兩峽間長數丈底開一竇以通泉渠土堅實過於石杠自尚家營以西三橋皆有短碣題曰平政進城一里住枝陽書院

廿三日出會甯西門涉河三道五里登王家坡又五里楊家溝
十里雞兒嘴循坡而下左右高原中為溝道頗寬廣一面低
窪有泥淖從高處行約里許又升一高坡碑底仍行坡盡下溝
越溝復過一峽共行二十五里入安定界時在溝底時行峽
中時登原上又五里新河十里至西鞏驛堡時方亭午署安
定縣事閱同文出城六十里連接見於驛館

廿四日晨發西鞏十里宋家溝過王公橋乾隆時鞏昌府王廷
瓚建跨澗上有碑題曰永定過橋有瓦舍三楹無窗牖當是
行人憩息之所由此升坡迂回而上高出羣山之表我馬馳
墮輿夫盡喘右沿陡壁左顧羣嵐層疊無復峯嶠如通長之
甬道如方畧之田疇魚鱗相次舒雁行列間有一二民舍儼
如奔枰布子亦如几案之上羅列盃棹浩渺平鋪迤邐橫列

赤土青莎斑駁相間別開一境界實則雖平地尚不知幾千百仞也至此以為絕頂宜知坡上有坡面前又起一墩又經一峽墩墩相接峽峽相連凡十里周家凹又十里始登青嵐山頂一名晴嵐俗呼為清涼山設茶尖於此稍憩由漸而降行二十里至坡頭上始下陡坡又行十里三十餘曲而至平地兩崖相接趨澗而過又上一高坡下坡即為安定縣東關延壽驛渡東河浮橋進新城東門即抵行館縣署在舊城之內新城環舊城南明正統時築

廿五日寅初即發出舊城北門涉西河亦架木為橋由十八里而二十里而三十里共經三鋪下小坡折而左又升一高坡五里紅巒鎮又五里曉口鎮峭壁奇秀雖無草木鬱鬱蔥蔥氣佳哉有茶尖鎮前後有水二道皆徒涉而過八里梁家坪

又八里至稱鉤驛尖飯後下斜坡五折土人肖其形曰稱鉤
由此登車道嶺之麓峭壁千仞竭蹶而升共五十里下坡即
達甘草店行館據地志升坡五里為打狼嘴又五里為平灘
峴又五里景家泉四里魏家窩又四里下峴子又四里高家
聚三里車道嶺六里白土窩為金縣界八里郝家溝五里甘
草店為阜蘭界與馬所經但時見人家一簇斷垣破壁依巖
附壑何地何名不能確指嶺脊高插青冥巔有平地左右皆
深壑天風浪浪一空依傍俯視羣山層疊皆在其下難不及
六盤山之高較清涼山則在伯仲間矣署阜蘭縣事張元濤
自省城來接至行館武巡捕陸在中與書吏自省來發到任
告示紅稿

廿六日發甘草店五里三墩營八里獨泥河七里清水驛一名

屯軍鎮俗傳為趙充國屯軍處又為金縣界阜金兩縣犬牙相錯時有插花地至行館夫署金縣事王譯來出城三十里來接飯復行五里大路口經一破峽頽牆留缺牆腹皆卵石填塞足底亦磷磷沒踝至坡頂前橫一泥淖雖小坡頗艱險難行又五里東古城四里樊家營又四里下西營又四里故坪又四里夏官營過此下坡循河灘行碎石流泉交投如織涉五六溝始登平坡地大路在山麓十里郭店子六里梁家灣導者由小路曲折升降共十五里亦達於梁家灣二里上古邨三里金家崖定遠驛此五里道阻且長溝塍時有積水崎嶇詰屈行至十餘里之久始達鯉一赤壁土名紅泥溝瀕五泉山產莢為最土色深紅巖實玲瓏剔透宛如假山王夫令復見於行館

廿七日寅刻發四里邠家灣三里寺兒溝循河灘登岸三里上官營四里買子溝過此又為臯蘭界四里賀家店升降土峽塵堞飛揚深沒足踝二里鐵鉞口五里響水子東坪下坡渡水一道兩岸相距頗寬或云即水經注之菟川水也又升坡為響水子西坪右崖缺處俯視黃河一線東下河流為羣崖所束激如漩淵深不可測南岸有長城遺址自此倚山循河五里為大水洞又五里桑園子為明肅藩種桑處羣山奔赴巖岫四合二里燕兒灣三里巖望溝五里下坡至東岡鎮行館尖秦介侯侯於此師生相見有如夢中國難家憂相對雪涕飯後行五里深溝子又五里空心墩三里劉順堡有碑題理學名臣段容思先生故里五里抵蘭州城外文武迓於塗次者二十餘人皆見於東關官廳即進迎思門又三里進南

門至署行祭門竈及三聖祠土地祠禮畢稍拂行塵督署派
府教授楊國培齎印至即出答拜崧制軍何方伯胡觀察皆
久談又拜新聘幕友潘和卿明經謝雨生茂才
廿八日終日拜客

五月

初一日辰刻接印任事

初三日署內辦公火食一切書役等費向由省釐局津貼銀二
百兩皋蘭縣一百兩皆送到每月如例河州有轎夫口食銀
每年五十金分兩次申解亦於前日解到二十五金

初四日午後崧帥及同城司道在左公祠卧龍閣公燕薄暮歸
定奏稿

初七日辰刻謁廟宣讀聖諭廣訓卧碑並製籤講書禮

畢回署放告僅收責德廳附生捐貢魏鈞請出學一紙

初九日發到任摺附一片以印花咨文交丞午託辦 萬壽元

旦賀表

初十日葉敦吾來將至張掖履新請科考先從甘州始知其為
供張計允之

十二日登涼州起馬牌定十五日出棚

十五日辰刻登程留蓋臣在署外事則責之果成一里出鎮遠
門折而北即望見白塔山一塔卓然在絕頂琳宮紺宇依山
高下階級厯厯分明山下即為黃河自城關出以二十四舟
亘河中為梁舟相距一丈五尺架木以聯之圍以朱闌皆朽
壞兩厓鐵柱四木柱四十五鐵索棕麻草繩各相屬橋之南
有坊題第一橋守令均送於官廳稍坐即行渡橋沿河右俯

山麓教官及同鄉同年均送於河干二里過金城關稠樓猶在園以磚牆八里十里店至此折西北行河流始為林木所障迤西有前明邊牆皆殘留高者約二丈餘十二里石家灣枕林甚茂結實大如龍眼又八里入沙溝在萬山之中兩崖壁立色深黑如積鐵山勢險惡雖無林木殊有陰森之氣曲折行約三里許徑稍寬遠望飛樓甲觀縹緲凌崖上圓下方前簷後廡儼有觚稜赤楠之形及近視之則皆石戴土而已其頂苔蘚濃縹作鴨頭綠色四壁則頽如渫丹蓋所經山麓皆碎石合土而成其色黑者無土皆石也其色殷者無石皆土也又七里至朱家井尖飯後行十五里白石頭山風刮面甚通繼以微雨雷聲隨之經一小坡由漸而升下視山峽中土色深紅宛如鄴地丹砂又十五里下坡宿俞家灣館舍庫

陋輿從分四店以處始能容

十六日枕上即聞雨聲黎明起視重雲密布冒雨登程三里至小澇池雨勢即加驟又三里蘭溝一里原山廟為皋蘭平番分界處四里琵琶臺過土橋折而北十里哈家寨此二十里閉置輿中不知途之遠近舉帷視有煙戶以為失站不知蹕蹕泥塗僅得半程也又十里狄家鋪又十里鹹水河始憩行館時已過午矣飯後行三里張家莊二里達家莊雨畧小五里觀音寺山門亭觀尚在勾工未竣十里泉溝頓自發俞家灣至此皆山徑過此七里下坡為徐家庀一稱徐家水磨豁然開朗始得平疇一路邨堡相望煙柳扶疏清泉灑灑頗有江南風景又五里至紅城驛土城周三里雉堞巖整煙戶甚盛居然壯邑堡外濃陰市野彌望蔥龍萬里行程記謂紅城

多綠樹信然紳耆在道旁遞粟為貧嫠徐氏婦請給扁額
十七日發紅城驛五里水槽溝又五里鄭家墩有龍泉寺二里
老界河當路有佛閣巍然高峙据陶君侍行記其額為統靈
二字今有二額其一曰通帝座其一亦三字非復統靈舊題
矣諦視其中簷下一額似係觀音閣三字八里青寺堡亦有
土城五里魏家槽子三里高岑營五里孫家團莊折而左行
又五里至南大通驛行館尖自水槽溝西北羣山遠合左偏
河灘灘廣一里餘碎石如麻新雨之後飛泉自上流建瓴而
下從石隙中搏躍而過居民皆過之為渠或設水碓沸聲若
雷一路流潦縱橫輿夫行泥塗中甚苦飯後行五里唐家營
又五里黑城子又五里南坡頭又五里柳樹墩又五里高橋
墩三里莊浪城城周四里有滿營駐防初設副都統今改城

守尉協領巴彥圖郊迎於城外莊浪協副將王國材亦列隊
出進行四里至平番縣南關知縣事湯霖迎於郊外進城一
里至西關宿龍岡書院在城官帑皆來謁惟見王副戎湯大
令

十八日寒披羊裘長刻行五里深溝兜鋪又五里馬廠溝又五
里鋪溝灣溝行不見一人登高麓始見有村落十里漢屬郎
坡下坡山勢漸合兩山之中有澗澗水迅疾奔流浩輪直下
勢若轟雷四山雖無林木頗蒼翠可愛一山壁立若斧劈作
淡赭色深如枯木亦的真畫家乾擦法澗中石子五色斑駁
尤多赭綠二色循右山麓十里為永濟橋原長六七丈光緒
二十四年為巨漲所漂僅存兩厓橋門與夫從奔流中徒涉
而過水若沸湯幾及馬腹復循左麓行五里至武勝驛行館

飯北牖陰森不敢久坐稍憩即行十里伏兔堡又十里為二十里界牌其實仍屬平番境並無犬牙錯壤二里營窩山巖十八里至金口驛宿守汛都司及馬隊哨官陳鳳均出迓至行館令之見陳弁不敢入拜於門外固揖之坐甚殷棘甚矣中國之輕武弁亦武弁之自輕也飯後即望見遠山絕頂積雪皓然聞前兩日尚降大雪六月飛霜何足異哉

十九日辰刻發岔口一路邊牆斷續村舍寂寥草先秋而已衰麥甫抽而未秀荒寒之景行蹤絕少十四里安家莊六里折腰溝四里王家鋪三里打柴溝始有土屋十餘家六里岡子墩三里得勝堡九里鎮見有新舊二堡此為舊堡行館在焉新堡隔河相距五里為鎮羌營游擊所駐飯後行四里過河即莊浪河之上游廣不及一里皆沙灘碎石如絮星隔河流

為三四道僕從皆策馬徑渡有導者引輿夫從淺處行走而木為梁輿夫側足而過岌岌欲動共越三梁始達彼岸七里相子廟亂山如鬟如髻迎馬頭而起登烏梢嶺其顛有稽查電桿堡房烏梢嶺亦作烏松山不甚高峻廣延不過二十里而氣候千變靈奇恍惚壞雲時起急雨驟來旋風如羊角扶搖而下陰森之氣逼人聞從前五六月常有行人僵踣牛馬凍斃之事山石五色陸離俯視溝中石子雲蒸霞駁有作鸚哥綠者濃艷可愛或綠色中斑點累累儼如昌化雞血凍置之吾鄉園圃中皆可作盆池清玩以是知物之棄於荒遠者多矣平番古浪於此分界凡行廿三里而至安遠堡五里至油坊臺驛八里龍溝河為古浪河之上游渡河兩旁山壁皆深赤如天台霞起而建標土色亦紅如丹砂山嘴約寬一丈

許忽作淡墨色石竅玲瓏如蜂窠極得皺瘦透三字意又二里至龍溝堡居民以山土築牆爛然耀目知古浪縣事王亮儒出城五十里來接既至行館王大令入見日晡雨至夜廉纖不止泉聲到枕隔牆如聞殷雷

二十日陰早發五里新墩灣又五里板橋墩又五里黑松驛舊有鎮市同治間為回匪蹂躪頽牆敗屋僅存數家而已過此經一河灘亂流而北登坡入古浪峽南為松林山北為鐵櫃山峻阪一錢曲折升降直達縣城形勢比輶轅之險五里杏蘭坡四里關王廟三里升高坡甚峻下坡為岔路墩守吏投茶尖於此由此而北河流益急山徑益險峻巨石如磐熊罴虎踞與夫循石隙側足而過石沿深澗悸心炫目五里新關墩三里十里鋪兩崖分裂中開一竇如門所經諸山皆石壁

高削惟此山土為表石為裏圓如雞卵攢若蠅房與皋蘭以東諸峽無異三里金家灣崖石崩頽流入河中巨者如屋小者如棗如白如栲栳排色如桃鮮妍欲滴崖壁亦深亦淺者如赭濃者如墨右山之麓一白石長方形如榔途人聚而刮其屑詢之弁勇云名甘酒石其屑可治刀傷旋刮旋長七里自高坡而下出古浪峽山勢驟寬城濠築土為橋橋南有兩水磨左右喧阗過橋即進南門至行館午後欲行天雨四山雲氣濃如潑墨前途尚有六十里躊躇不敢發命止宿

廿一日發古浪北門外三里進溝道其地即曰三里墩五里八里營二里丁家牌樓兩面題額各四字南曰矢共姜操北曰守淑姬義陶君侍行記僅見在北一面又倒讀其文誤為義姬淑守此十慮之一失矣又二里小橋鋪三里嚴家灣十三

里雙塔堡強半屬古浪少半屬武威王大令設茶尖於此稍
憩卽行八里有土阜當道中裂一罅可通車騎二里花腰墩
五里大墩有村舍居民匍匐迎於道左卽與中揖之武威境
有六壩農田資以澆灌自此行六里過頭壩河四里楊家鋪
二里二壩河五里靖邊驛自出古浪所經皆土溝窄而崎嶇
茶尖後入武威界渠水通流一二里內輒有大溝隔之寬或
至一丈餘策馬可涉而與夫赤足曳水行甚苦知武威縣張
又履同年自邵七十里來其道揖之後見於行館略談卽別
驛堡聞從前居民稠密自經回匪蹂躪才遺之民晨星落落
蓋二十年元氣尚未起也行館極軒敞潔淨自出蘭州後為
第一又履送府志與團憲綱冊檢與團雙塔堡以下祇有楊
房堡閭家堡卽至靖邊驛無頭壩河以下地名

廿二日早發由三壩河經三壩墩四壩河相距各三里又一里
為七里堡二里五壩墩三里張家莊三里六壩墩八里河東
堡自此以西所經皆沙灘平曠碎石滿地左顧祁連山頂積
雪皓然夏秋水融湯湯而下流潦縱橫居民皆引以為渠時
須寒裳而涉七里塘馬墩十里大河驛堡行館尖午後行十
里黑泉堡即二十里鋪也又七里十三里鋪八里五里墩三
里集賢亭又二里至涼州東關涼州府知府慶雲閣張大令
恒都統壽張總戎世清號健亭及七屬教官皆於官廳相見
畢一里過迎恩橋進東門約行三四里始至貢院

廿四日天未明即起謁 廟講書畢歸署循例閱圍牆放告

廿八日一等生覆試皆置之堂號武威王樂山雜坐稟請分廩
附為二處意者其有捉刀人乎即驅廩生於堂下親坐堂皇

蓋截逐卷閱之惟武威魏廷相前四行無一字切題董世佐
交卷最後視其文皆庸詞此外尚無弊竇

廿九日考優貢合屬舉優十八人平番徐升堂卷文如塗附廉
隅之廉寫作廉鷹揚之鷹寫作鷩濫舉之咎微司鐸其誰歸
六月

初一日調覆童生武威東堂卷一卷諸生評其匿喪未敢到點
名既畢忽有府禮房持慶太守名判請收考云該童已出洞
並無不合例略予駁詰即拂然云但請給卷何必再問正深
詫異認係廩生楊利仁亦持節略跪求閱之始知該童出洞
胞叔於今年二月初一日丁本生母憂繞逾百日儼然墨經
赴考該廩生等以為一行出繼今生即恩斷義絕如此悖倫
傷教之事公堂之上敢於漬請真同化外此而可忍孰不可

忍即命擗出楊利仁懸牌褫革

初二日昨日舉發匿喪之康生王佐才等今日又為楊利仁環求開復告以情節甚重以待來年

初三日新生掩覆申酉之交始入場索贄之風較吾鄉為滋甚此間首籍盤至瘠不能不稍優容之

初五日辰刻發涼州出西門過永安橋共行六鋪四十里而抵

永懷渠即四十里鋪也

過十里鋪二里郭家鋪又八里三十里鋪五里鋪二十五里鋪五里三十里

十鋪十里鋪

四總於行館張大令及內巡捕周堯臣送別至此回

飯後行五里酸酒店又五里懷安驛六里律字墩四里昌隆登堡十里登樂堡行館宿自郭家鋪以西行沙磧中碎石如拳流澌交織輿中揮汗如雨左顧祁連蜿蜒不斷遠望山頂似有積雪日光映之如白雲一片迷浮霄半

初七日丑刻卽起籠燈就道村犬四吠聞無星光五里沙灘堡
五里大墩十里柔遠驛天始明三里永昌界牌入永昌界凡
三十二里而越五壩計三里為九壩墩又四里八壩墩其西
卽清溪堡有行館飯後行十里樂豐鋪未至鋪二里先有腰
墩五里七壩墩四里六壩過壩一里有宣德堡又五里至五
壩又五里通津堡與清溪堡皆名三十里鋪清溪之三十里
自豐樂堡言之也通津之三十里自永昌邑城言之也十里
真景寨半途有腰墩陶君經此寨時尚無人今則牆陰有村
農三五捫虱而嬉城隅望樓亦有登高而眺者蓋回匪之亂
言旋言歸復我邦族僅此才道而已宜漢民之愆固結而不
可解也又二十里抵永昌縣東關每五里有一墩行館甚湫
隘馬矢填門旁穿上漏睡後涼風由屋隙而入燭光搖搖黯

然無焰略寐即起

初七日丑刻發天氣驟涼出永昌西門暗中但見街衢寬廣樓高聳凡四層五里一墩十里一鋪滿地石塊漸大如磐聞車行其上兩輪磨戛碌碌有聲又五里牛王宮但有小廟三楹杳無人跡又五里水磨關舊有市集回亂後寥寥十餘廛而已一里過水磨河出縣西南鸞鳥山一名雲川邑城雲川書院取名以此三里紅廟鋪狂飈驟起陰雲四垂輿中瑟縮如墜又行四里過卜喇灣升降沙阜風益厲寒益甚即下輿加重棉仍不溫以絨毯覆身而睡昨晚尚熏蒸似盛夏今日凜冽如吾鄉初冬氣象天地之氣不測至此真匪人所居矣二里崇岡塘五里橋兜墩又五里金川坡一名三道溝晉之金呂城地也看似土磧細審道旁石根瑩瑩作黑鐵色猶望

白楊衰草草青黃色俗名茭茭可索綯又五里空心烽墩據
陶君所記墩之前有豐碑十餘丈題張將軍戰勝虜蓋明萬
厯中榆林張臣破卜失免於水泉即此地也五里下坡為王
秀堡坡間兩峽皆五色石卵攢簇而成密如牆牆十里至水
泉驛堡周一里有奇至行館日未加午

初八日發水泉驛五里一墩十里南北兩山剝然中分右沿邊
牆又五里古城窪始入山丹縣界漢之日勒縣地也南北兩
墩大小斜對十里定羌廟舊堡倚邊牆而卜築僅存頗垣破
屋門洞題神功永賴四字尚可辨南北兩山至此勢又漸合
十三里邊牆迫山根而上南望大黃山即馬支山積雪終古
不化今日陰晦不見匡廬真面又五里折西北入山丹峽邊
牆自山岡蜿蜒而上當嶺脊已全塌四圍藤蘚滋蔓惟牆址

一白不生片草峽中亂山環抱頑石崢嶸石皆淡墨色或微
赭絕壁深黑望之如枯木槎枿鍛成數炭古銅斑駁蝕以土
花二里出峽為峽口驛飯後行七里有汎激八里營城鋪微
雨灑塵十里王城鋪又八里新添墩署山丹縣事杜翺杜文
正之孫自城來接七里至新河驛行館

初九日卯刻發新河自永昌以西皆沙磧不毛出峽口始見田
疇過新河村堡漸稠密十里居安寨行三十里抵山丹縣五
里一墩十里一鋪所經邊牆皆沿南山之麓雖有斷續其平
尚完四五百年壘土不毀今無此丁程矣早起尚披羊裘至
二十里鋪日漸高蒸蒸然汗出即起脫兩棉二十里鋪亦名
永興鋪過十里鋪五里行山丹河灘中山丹邑城環以外郭
內外甕門皆二柱深達兩壁環植方木為柵年久泥浣色如

古錢外關渠水通流清可見底中生五色石卵燦然可觀自東南關入抵行館見杜桐巢大令飯後仍出東南關過山丹河即弱水之東原自此西行仍五里一墩十里一鋪至五里墩又五里至獅山一名石嘴巖上有大佛寺明正統中太監王貴所建杜大令先候於此同登瞻眺辨香禮佛像依山鑿石其高三十丈覆屋九層較邠州之佛大倍之較正定之佛三倍之方鳩工修葺不克登其顛僅見兩踝以下而已桐巢云城中有髮塔寺亦祇林古跡娘娘廟有銅鐘銘視其文無年月筆畫遒古非近刻也出寺行三里經石嘴巖上有亭樹山不甚高而紋巖中空頗似海浮石再涉山丹河西北行二里祁家店俗稱十五里店子有渠有堡樹木叢密亦間有市廛二里石嘴子左邊小山遙連若几案之可撫四里二十里

鋪鄉老環跪攀輿以舊有義塾移設祁家店村童無可肄業
遞稟請復又行六里為大橋寨寨外一里阻河支本為梁過
橋即屬東樂廳界三里大墩廟據陶君所記路北方堡有三
樓一方臺式一高長堆垛式一胡盧式大橋寨四隅有小樓
凸出今皆未見又二里十里墩又二里樂定堡又八里抵東
樂土城城周二里有奇乾隆八年設分領十四堡錢糧而大
事受成於張掖所轄境祇二十里而歲入遠過合水兩當諸
瘠縣通省分縣第一缺也進東門住行館縣丞蔣人杰湘人
蔣潤吾之族來見留心文教風塵中之車馬者出新河驛見
州花三種皆白色其一貼地而生一花五瓣旁無枝莖小如
榆莢其一亦五瓣上微銳黃心頗似南方金銀花葉叢生如
松柏其一一莖挺立枝葉皆左右出一葉分十餘瓣左右鱗

次上銳下疊花抽莖中亦左右密排卷心攢簇其形尖長略如茉莉花過山丹城見一州結實如蒲萄色淡紫帶綠長而下垂皆不知其名也

初十日天甫明發東樂行沙漠中十里山陽鋪入張掖界又十里架子墩始有村市二里逍遙墩五里古城子即仁壽驛葉敦吾大令署張掖縣事遠來迨於驛外並聞甘州府仁圃太守瑞壽亦至驛遠接愧不敢當即至行館先見瑞太守既與敦吾略談飯後即行十里驛灘堡土質稍潤之處皆浮白色誠哉其為驛也又五里馬蓮井墩七里二十里鋪皆沙磧淺處皆轍跡履印深處可沒踝鬆而上浮輟可下陷寸草不生漸有窮荒沙漠景象出磧即為二十里鋪有村堡有林木棗樹濃蔕大可適托田疇相接泉水通流別開一境界矣又五

里四角墩又七里青龍鋪焦凱泉軍門以所乘肩輿來迓八里至甘州府東關軍門迓於官廳相見各致鄉誼與鄙人同庚亦同抱伯道之痛相見畢即進城至貢院城周十二里有奇貢院在西北面城尚軒殿

十一日辰刻謁廟禮節與涼州迓別府縣皆隨同行禮隨同坐班諸生旅進三揖頗整肅講書畢陳獎賞紙筆於案上諸生羣取一閱而散以禮始不以禮終惜夫歸後即放告收兩紙一請開復衣衿情尚可原與批准其一潰控毆辱毫無証據情詞支離朦混有似心疾嚴飭之涼州無一私牒而以節孝請者十餘紙風俗厚薄相去遠矣

十二日穿葛衣在此間為盛暑矣

十五日歲試童生昨臨卧山丹學教諭苟萃珍忽詳稱康保張

聯輝雙目失明無從識認亦未應考請改派等情前來即飭
吏偏查學冊認係未與試者有十人之多並有丁憂者五人
學官扶同隱飾斷難姑息但時已交亥子點名在即不能即
發今日出示甘州府學及張掖縣教官均記大過一次山丹
教官從寬申飭認係廩生張聯輝姑念年逾六十雙目失明
給與衣頂趙振基降附鄭如錦已投卷臨場報病勒令補考
如不補考亦降附派保廩生均降增發生一等案府學十四
名趙懷泰第一張掖十六名張鴻儒第一皆取古山丹十二
名李福年第一

廿一日生童發落畢束裝

廿二日昨睡後雨驟甚簷溜之聲斷續徹曉知難冒雨行穩睡
至辰初始起雨脚仍廉纖不絕奴子來言黑河水驟漲平時

深一尺餘與夫褰裳可涉若至二尺則須用牛車龜水而過
午後葉大令來言水已至二尺六寸四山積水奔騰而下其
勢未已閭甚

廿三日黎明夢回甫聞捷奴子在榻畔啓云水深三尺矣及起
盥沐畢巡捕王晴嵐亦來稟此事即令其往水次察探並命
戈什承差各一人同往晴嵐甫出城關外巡捕王典史即自
河畔回云水深湍急洶湧異常其寬幾二十里一望汪洋牛
車之輪高於常車前俯後仰淺處已將濡尾若驟駕之輪車
則幾滅頂矣其勢萬難涉險葉大令來余告以行止遲速非
可起期請無供帳堅不允瑞太守亦來請留又見王典史略
詢水勢遍問圍人騎卒有無迂道可繞皆不能對束手莫展
一籌過午重雲蔽日又有雨意如之奈何

廿四日昨夜雨聲連旦黎明始息而陰霾仍未散晨刻探水者
 歸云黑河漲已漸平可亟渡詰其雨後水勢何以轉淺則云
 黑水之漲本不因雨而因雪天氣晴暖四山融雪奔騰而下
 其勢可以驟盈昨日陰寒今日早旭猶未升雪澤故未釋若
 因循至明日則盈縮不可知矣即傳命束裝已正出西門但
 見流潦縱橫塗泥蹉蹌一里王家橋渡河用牛車其輪約高
 八尺圍徑二丈餘駕一健犍水卒五六人左右夾持迂回從
 淺處行約二十里幸水勢分流水所不經處皆沙灘共涉巨
 流三四處細流十餘處沿東岸一流最浩瀚端亦最急展輪
 還渡水聲若雷浪花噴薄激濺襟袖至中流牛將沒頂四足
 盡浮昂首側行而過視從騎水皆及馬腹一騎已仆於水中
 羣獲得免未正始達彼岸是為二十里鋪西行過一沙坡皆

浮沙堆積而成衆騎蹴踏蹄跡一一可數陶君云沙阜隨風
移徙車行沙瀉如磨吐粉土人謂之沙窩子約行九里寂無
人烟惟道右有大墩又八里一墩五里一墩又八里至沙井
驛時天已薄暮即止宿卧室暝黑當晝亦須然燭

廿五日卯刻發出驛即入撫彝境行四里見道北有梵宇遠望
有亭翼然頗極出還又六里沙灘堡亦稱小沙堡居民二三
十家流泉灌園老木當門大半皆棄棗間以白楊樹五里賈
家莊撫彝廳通判周鼎泉渡沙河來迓既見即云沙河水勢
方漲請即以其車涉視其驛甚健御者亦熟於水道搖鞭逕
渡東西約寬五里許巨流三道自南山洶湧而來迅如竹箭
中流最深處幾將四尺將登岸見水中木板順流而下和卿
並見一鸛鷖皆自上流衝激而至也其奔騰砰湃之勢視黑

河殆過之昨渡河有戒心今日無預白者驟然遇之耳目猝
眩有聲有色雖云履險亦大可觀也既登岸即為沙河堡行
館在堡外周別駕即來見以同鄉談極久飯後行十里花牆
堡燧臺卓立曠野中十里廣屯堡又十里古寨堡皆略有居
民廟宇又行五里經沙磧四圍沙岡重疊皆迤長而下削微
風起沙即隨之而傾瀉宛然塞外沙中亦有草叢生高不過
尺許色青蔥可愛形如竹葉又五里自一沙坡而下即抵撫
彝廳其城周一里有奇乾隆十五年分設領二十四堡守備
董上林出送進城住行館

廿六日聞微雨灑窗紙浙濕有聲旋聞簷溜瑤琤達旦未絕披
衣起視重雲如幕幸距高臺僅四十里亟盼放晴尚可行至
已刻又急點跣珠蓄勢一洩之後雲陰漸薄微露日光即傳

命行甫出城行田畝間結墳如漿滑不留屐稍遠入沙磧地
漸乾凡七里為新工堡又八里雙泉堡亦名小魯堡設茶尖
於此欲趨程未下輿出堡即見沙坡一道如長隄登坡彌望
平沙新雨之後蹠迹迢迢造周圍共四五里無一莖草無一堵
牆行五里魯灣墩但見一大烽臺五小墩露立沙中旁有額
垣過此入高臺界即叢草繁殖北望有故牧者赤駟青駟相
間成羣又五里渠口堡雖高臺城十五里矣行七里而有一
鋪自渠口以下道即泥濘過八里鋪兩岸皆平曠中間雨水
豬為深溝麥穗正黃粟亦甫結實垂條鋪茶下揜隴際所
留餘地不過寸許高处既無着腳地窪處盡稠泥與夫前跋
後躓幾陷於坎者屢矣望見高臺城闌始得乾淨土進東門
有兩木坊但各見其一面四字一為東接金城一為建康砥

往街市積潦縱橫如塗塗附一如甘州出城時行一里抵行館先後見陳大令瑞都聞時已暮謝餘客

廿七日晨起積霧初收濃陰未散辰初出高臺城文武送於西門外離市稍遠有月牙湖一段中互兩面澄潭微風漾碧清且漣漪宛游江南雲水鄉堤通水處左右架木積薪填土為橋凡行五里有一墩八里有一鋪過鋪三里經驪灘四里灘盡為臺子寺西涼李嵩築臺故址後人建寺於其上縣之取名以此道左有鎮西堡又行五里宣化堡距城二十里矣天又雨漸密如散絲六里過定安堡之北有村舍十餘家四里大凝堡亦名安甯堡土人呼為羊達子堡繞堡牆北面過二里擺通河即擺浪河土人又呼為羊達子河其流北入于弱水深不及二尺過河西皆沙磧自五里墩而西積雨汎溢泥

滑如油與中惴惴如臨重坎惟沙可涉水雖奔馳無礙至此如從荊棘中忽得康莊大道又如出幽谷升喬木心開目明始知雨後征途莫妙於沙磧莫不善於溝塍村堡村堡尤忌稠密溝塍尤忌膏腴耕田欲雨刈欲晴來者順風去者怨使今日五十里皆為沙磧不毛豈非行旅所深願哉八里狼窩墩或稱永豐堡右側有田含有林木五里攔馬墩又五里黑泉驛雨益驟幸進堡即住行館堡周三里居民三百餘家為西路各堡之首

廿八日天未霽枕上但聞空中怒號有若驚濤殷雷亦不辨為風聲雨聲也起後密如散絲暮然破塊自辰達午再接再厲叉手巡檐正在咄咄無聊忽聞鳴鉦聲急詢之云黑水暴漲距此八里之遙有一河為其下流亦汎溢里胥集人夫住堵

築隴以西素無淫霖可謂適逢其會矣此堡頗稠密亦略有
市集通庖人求白麪不可得求豬油雞蛋亦不可得到一羊
為供爛頭爛胃羅列滿案仍無從下箸

廿九日卯刻發黑泉驛三里張家莊有一墩又行十里每五里
一墩第二墩曰水灣過此皆荒蕪不治沙磧十之二三棘灘
十之七八又十里見沙阜累累皆平漫結頂微高略如覆盆
而已又一里花牆堡據陶君侍行記所述產蚊子草結實如
球蚊出其中行旅苦之陳大令遣僕煮茗相待憩片刻未見
有一蚊也又七里新添堡南山即祁連一脈從涼州遙邐而
來數百里不斷山頂積雪瓊瑤萬仞雲氣自山腰出冉冉上
升漸與雪合遙望但見如綿如絮蒙蒙四合并峰岬亦模糊
矣北山即合黎弱水經其下惟見疎光一白縈繞山腳又五

里登紅寺坡一大沙阜也在高處遠眺始見黑水滔滔西下坡有古刹殆即所謂紅寺僅正殿三楹尚整齊前後皆頽垣碎甃而已一墩臺即在寺後又五里中沙墩又五里山嘴墩此十里皆沙磧自紅寺登坡後至此始下坡然十里內地勢亦高低不一時有升降中沙墩一名地耕坡山嘴墩一名深溝墩蓋往來者於此升降曰山曰溝各就其升降言之也道旁堆小石一叢土人呼為石人子言神所依云又十里至深溝驛尖將至遠望堡牆皚皚如積雪及近堡諦視土壘內黃而外白如潮蒸霽色始知其磚取土於地地皆礧硝也行館即在墩臺旁飯後行十里靖邊墩又五里雙泉墩亦稱馬蓮井子土人五六家結屋沙漠中不知其何以為生也又七里東八里墩又五里沙嘴墩又三里抵鹽池驛即在鹽池之南

岸也於出深溝後在礮灘中見一艸枝上起而堅動其葉如
桃柳其花如梅杏含苞磬口排色甚豔遍地爛如鋪錦又一
種叢生似蒿花如木犀但有紅紫白三色又一種葉似蒲而
微短花下垂略似螢其拆者中作深紅色又一種貼地叢生
無葉色紫似荊花

三十日早發百里荒郊無林木無田疇無市集并南北山亦窈
冥不覩但以墩堡記里自鹽池西行共十四墩七墩至雙井
驛尖七墩至臨水驛宿烟堆四墩距鹽池五里第一又三里
西八里墩第二又七里半截墩第三其墩半圯剗然中分半
截之名以此又十里登沙坡為苦水墩第四有土屋三家今
日所經皆礮灘惟此一牛鳴地為浮沙又五里沙河墩第五
又五里東新墩第六又五里即雙井驛礮堡西亦有一墩第

七飯後行十里西新墩第八曰西者封東新墩言之然東新
墩似新築此墩則剝落過半名不稱其實矣又五里下營兒
墩一名河清墩第九又五里界牌墩第十大墩頗廢五小墩
僅存中一座左右惟賸土四堆而已自此入肅州界計過撫
彝廳至此凡三日程皆屬高臺境朝夕供帳已六次又十里
蘇溝墩第十一疎地忽蒸而為深紫色其上略似沙質其下
爛泥深不可測望之頗似京師老牆根裏殿又如敗醬缸人
馬蹴踏左足甫起右足已陷但聞堪蹕泝泝之聲兩生于沂
兩車先後陷於淖晨發即聞黃泥鋪地最惡為無間泥犂此
墩正與毗連已如此正以前途為慮豈知一出蘇溝即得乾
淨土漸行漸燥不啻坦坦康莊矣人言之不足據如此凡十
里而抵黃泥鋪墩第十二又十里劉斌溝墩第十三又行的

五里道旁有一墩第十四又五里而至臨水驛肅州牧余承
曾見於行館途次所見一州似吾鄉檉柳細葉柔條花似紅
蓼絡索下垂和柳以為即檉柳也又兩種小如鵝眼錢一五
瓣白色黃心一青紫色細瓣攢簇又見小蝶羣飛色如牽牛
花栩栩忡忡際亦隴上所罕觀也夜大風繼以大雨

七月

初一日黎明雨甫息重雲未收躊躇至卯正始發出驛西門下
土坡二里至臨水河畔臨水即紅水出州西南八十里山內
東北流至此又北至下古城會計來河討來河即唐之多樂
水也坐牛車渡河苦雨決旬水勢暴漲然兩崖相距不甚寬
中洪流亦緩較沙河為易渡無論黑水矣過河三里為下古
城堡五里雙橋墩路北有廢屋牆垣尚卓立黝堊亦不甚剝

落觀其蹊徑窳窳戶牖玲瓏似非尋常第宅不知何以荒廢至此過北折北行十里有二十里鋪有三墩鋪曰二十里鋪一墩在鋪南六里曰三墩二墩在鋪北二里又北八里為頭墩二十里鋪別有一頭二墩皆有弁兵站道墩之巔有況兵墩不在三墩之內遠眺近則升旗鳴鉦前此所未有也過二墩後沿河行頭墩隔河有神廟頗巍煥遇此五里為紅橋墩又四里永固橋半里酒泉亭上有亭榭皆左文襄所修建古稱其泉味甘如酒中間廳事曰清勵樓安肅道和爾賡頤肅州鎮總兵永明新牧余刺史舊牧符瑞與五屬教職同出迓相見於樓下又半里進東關門外曰迎曦內曰迎恩進東門二里至試院在學宮之左

初二日辰刻謁廟歸循例放告閱圍牆肅州學諸生公呈舉發

州署捕役方彥升之子易姓冒考余刺史欲為游說拒之
初六日童正場高臺寄籍童生孔延緒前日余刺史而請已准
其收考矣今日復有高邑附生二十餘人臨場遞呈阻考復
在轅門外聚眾毆扭不聽解散即飭兩人交提調看管其一
關立通以關侯之裔攻宣聖之裔又宣其祖考意乎故排後
知該生在州署仍咆哮不服是非嚴辦不足以肅場規而儆
效尤照例寄籍以二十年為限甘省經左文襄奏請十年即
可應試科房未攜原卷即命調取縣卷並飭吏繕稿
初七日余刺史袁來云阻考諸生已服罪求寬一面之網允之
初九日西陲回民與蒙番錯處在北朝時沮渠諸連禿髮先後
迭興往往尚有苗裔故頗多希姓涼州有把甘州有扁禪此
間有公妥運皆致譜牒者所未聞也

初十日童生覆試辰正冊卷始集而肅州尚有兩童生未到詰
康保皆摸稜以對臨點面詰童生皆供禮房索重賄不給卷
試冊東日壹一本於壹下誤增一拾字他冊凡第十號皆云
東某拾西某拾不加壹字弊混之跡顯然康生顧伯愷因學
官責其遲到不服反脅幾致扭毆喧聲達於內士刁吏玩至
於如此萬難姑息卽以學書交提調訊辦並以禮書舞弊事
告之簿幕余刺史始來云學書禮房均已掌責示懲其意似
甚不憚聽之而已

十二日科考生正場黎明啟局門外寂然云到者不逮一半陸
續補點至三次尚有十五人未到既升堂蓋截查出東列十
五號一卷混入西大號與來字十七號同生歲字空號卽分
別掌責坐之堂上以為諸生當知所做懼矣乃午後親坐堂

皇時有西堂號廩生張宗鑑已交卷以兔園冊擲入大號禁之不理責之執所攜書抗辨未幾又有擲紙卷入號者肅州雖在邊隅尚為內地何至形同化外諸生藐視場規目無法紀若不嚴懲則鄙人為溺職矣即懸牌張宗鑑即行褫革臨點不到之新進王瑞甫得一稔不知自愛亦與褫革廩生並降附安西廩生柳學孔趙蟾青已致貢即撤銷附生發學戒飭一日之間應接不暇科房亦幾於脫腕

十五日辰刻發落畢降廩劉繼武等求於堂上革廩張宗鑑求於轅外臨點不到尚可末減張所犯者私罪峻拒之夜束裝十六日出東關同城文武及諸生均送於酒泉亭至臨水驛宿十七日聞黃泥鋪積淖未乾迂道五里由北路行余刺史送至二十里外伍公渠茗話而別四十里雙井堡失印入高臺界

夜宿鹽池驛所過鹹地經炎日蒸晒皆拆裂如龜兆皮片片剝落如松鱗余謂之地無鹽池日晒之後即上結一層如米皎然潔白不必熬波而始成也

十八日深溝驛尖飯後行三十里至花牆堡聞道旁閭閻聲俯視草間羣蛙跳躍小如蚱蜢亦西來所始見者堡產瓜以哈密子下種味甘如蜜可亂真高臺令陳馨圃自城來接設茶尖於此班荆略談又行二十里至黑泉驛宿前度遇雨於此曾留帶一日蓋已為桑下之三宿矣

十九日辰刻發黑泉驛自驛而東鹹地已墾熟成田來時麥穗方秀黃雲連陌今皆已收穫矣每田一區界以一溝溝上當路架木捷草實土為橋下鑿一竇以通水與馬皆經其上前日過臨水較來時水淺尺餘今日涉擺浪河淺洄成灘中間

水槽僅如沮洳而已行三十里至宣化堡茶尖又二十里日方中至高臺縣行館館之東為都司署又東縣廨又東學宮城隍廟在南東向西關外月牙湖平曠淺水菰蘆蕭瑟有江鄉風景若於湖中築土為釣臺建亭其上架木為長橋以屬於隄隄上植楊柳繞以迴廊水中種荷芰之屬夏日花開紅衣翠蓋不減吾鄉莫愁湖也

二十日辰刻發四十里至撫彝廳行館復至沙河驛宿

廿一日辰刻過沙河前之急湍怒洑皆洄為沙灘東海楊塵即此亦滄桑一度矣二十里沙井驛尖銳吾自城來接飯後渡黑水僅巨流三道亦深不過二尺許可以厲揭矣來時兩崖最廣流亦最急今巨流皆在中間河流無定不但虜沱然矣焦凱泉軍門率其麾下及府縣數職先後見於官廳既抵貢

院復見瑞太守葉大令皆久談

廿二日辰刻謁廟歸即放告有附生劉澄高士魁控增生陶學詩歲試正場為王積福代借考列前茅即發教官詰其有無憑據則具結言得自傳聞懷疑誤控此事不便深究准予銷案又有鄉民周多年周芝元等遞稟巡捕初未收聞至頭門內喊冤及攆出又在轅門外滋鬧聲達於內意必有不自之冤情極仁訴命收其呈觀之則控告童生秦鏡中身家不清及通賁繼母等事不但非切身之災以一鄉民而干預考政臨場攻訐又未存府縣呈訴冒昧越控殊出情理之外即飭縣澈查簿幕敦吾來持甘結兩紙欲為消弭告以刁風不可長所告即事事皆實亦有不應之咎先枷示轅門秦鏡中是否身家不清查明再行核辦

廿三日生童古場並補歲考開門後外巡捕傳言有人在外招搖撞騙妄稱與署中人熟識可通關節進學一名百金先付十兩其徒黨不止一人均在三十歲左右衣服麗都口操湖北音即命吏繕索飭拿

廿四日生科正場即以昨所聞而屬瑞太守葉大令啟局後復懸牌飭拿又出賞格拿獲五十金知風報信二十金暗嵐云前日鄉民控秦鏡中其呈既不收本不敢喊冤一縣署連來之門役慙慙之今日王典史亦送縣責一千同枷示戮役自宜嚴懲不為過也

廿六日前以諸生欠考繳學官查有事故者汰除之以清積案山丹學苟萃珍查報病故四十六人其餘除補考外實在欠考者無可藏身替絲可就理矣懸牌記功獎勵之前歲考時

認派廉保有不應考者分別降增降附此次放告遵呈求開
復瑞太守亦力請具稟上詳皆允之教官所記大過亦注銷
出科生案府學一等十二名吳遐年第一張掖十五名張鴻
儒第一山升十二名趙懷泰第一查歲攷案盡同府學并次
三名亦未改張掖惟孟升瀛一本由三等騰躍而出此外三
屬無超乘者新進惟李聯星周毓豐得一等兩生本童古場
魁楚皆由閭中摸索而得之先無成見可見文有定價策論
取士勝於時文即此亦可見一斑矣尤奇者劉澄糾高士魁
控王積福歲攷一等人所捉刀前日正場坐之堂號今仍列
一等第七劉通第八高通第九亦發案後始知之豈非天道
之巧哉

八月

初一日新進童生復試過午盡交卷矣兩本不足三百字一本旨酒皆誤書為肯酒比較之伏獵金根殆有甚焉雖不必孤埋之而孤措之夏楚不可少矣

初二日新進童生總覆肯酒一卷傳觀闕堂夏楚五下聊示懲慙

初四日自甘州起馬文自瑞太守武自焦軍門以下皆送於城外河西山長羅子衡率諸生送於東郭門新進童生繼之教吾諸琴皆送至古城子尖站東樂縣丞蔣韵廬迎於山陽鋪十里至行館宿

初五日寅刻登程蔣丞送於五里墩過二十里鋪祁家店老稚皆送於道左遠從者勞之山丹縣杜桐巢大令自城來接繞石嘴巖而東渡山丹河即進城抵行館今日本當宿新河桐

巢以劉太守西來探得今晚通抵新河地小不足回旋恐兩賢相厄堅留暫駐允之在桐巢署故極久在大堂後見再至堂扁有題字已剝落未詳其姓氏也歸後桐巢復來談餽贐五十金卻之受花翎一枝

初六日晨起候劉太守未發卯正聞前驅進城旋至館各以行裝見一往一來迭為賓主余未克出城遂進而太守復與文武同送至東郭外誼有加已二十里鋪茶去又十里遇居安寨寨西緣以磚垣中開雙門上有神樓寨之東有一廟廟東有八角亭亭設一龕中奉神像踴聖尚新皆來時所未見也又十里至新河驛宿時正加午昨日劉太守駐於此真所謂傳舍矣晚餐聞桐巢來駭甚歡甚送往迎來東征西邁今日約計奔馳百里外矣即飭僕持帖往謝且阻其毋前赴峽口

驛

初七日寅刻發桐巢來話別共行九十里峽口驛尖山丹水泉

驛宿

永昌界

當飯後行山丹峽來時由中間大道今循邊牆之

麓山色近視乃逼真石髓赫如墜諸山膚紫於焦炭魚鱗鰓
鰓石骨嶙峋儼如枯筆皴擦而成碎石滿地如鐵屑道旁磐
石皆現斑點作深黃色或模糊如血漬

初八日天寒早起穿羊裘卯正發水泉驛登程復即微雨行二
十里至空心墩而霽又二十里渡水磨河至水磨關茶尖時
已向午從者進雞子蘸青鹽食之由此而東巨石塞途流泉
交織涉河流四五道深淺及蹊皆滑可見底碎石如麻淙淙
甚急皆來時所未見也又二十里至永昌縣城先至文武各
署答謝經藥王廟準提寺副將署即在其東規模頗闊故黃

大令以舊廬湫隘借山陝館為行臺花木扶疏垣宇堅整卧室在春秋閣下登閣憑欄惜為高墉所隔不能眺遠

初九日卯刻發六十里清溪堡尖午後又行三十里至豐樂堡宿今日所經之地碎石碁布五色相宣百里不絕多於恒河沙數有緋色尖圓如桃者有翠色巨長如瓜者有紅質金星者有黑質玉帶者又見片石橢圓綠色白筋宛如荷葉不可謂非天工之巧惜文章爛然而其質粗惡不足供彫琢磨礪此所以弃於地耳

初十日辰初發四十里鋪尖實行三十里東至鄯城四十里耳飯後行二十里張健亭軍門先遣其親兵小隊來又率五營將弁迺於官廳一見即詢張鴻儒蓋其在甘州時所據拔士也進城至貢院今日所行七十里石子依然纍纍不絕但其

色漸淡昨所見者赭綠二色最多綠者轉而為紫又轉而為魚肚白紫者轉而為紺又轉而為雀頭紺馴至無色而頑石之本質見矣與吾鄉麓沙石無以異也每至高阜中開或溪澗兩崖鱗次櫛比亦復縱橫錯置有如舂鍤所成

十一日昨健亭遣材官籠燈餽孤裘兩襲雖暮夜有知者坦然納之得賀中秋節贖十餘通何方伯一函內附啟一紙為人通竿贖塗鶴惡札文理荒陋可哂望而知為廣鼎胆大妄為極矣

十二日辰初謁廟講書畢回署放告收節孝牒逾三十通安定女宗之化建矣見六屬教官告以清理欠考事

十三日試生童古場並補歲考生卷不足一百而童卷轉逾三百本題牌甫出號舍即往來如織禁之不止扶一人出蓋戲

又查出非原疏三本皆坐之堂上既退堂即有兩童傳遞書冊亦扶出至於卷面標犯規不閱字交卷極速未初放頭排而淨場暮色蒼然矣

十六日童王場鎮番傅長庚於接卷時訐府首俞肇基匿喪胃考既局門面詰之不服教官謝庭芝袖出府呈四其一馬序雍張保泰等舉發公呈其一康保石儒彥訴詞其生母石氏即該康生之姑也力辨以為庶母俞肇基非其所出其二一為程維道一為鄭紹周等皆左右袒者也淨場後坐堂呈集兩造環質馬序雍張保泰盧蓋臣皆稱若証言甘反坐而俞肇基囁嚅不能對但云年幼家事不能盡知研詰至再無可抵牾始俯首具結自認匿喪是實願甘扣考

十七日制軍賀秋節函自驛遞來又附入膺鼎一通仍借方伯

之名申前說不覺駭然即請張又履同年面商以兩函示之
又以俞肇基甘結交又履轉達慶太守以其為府首也

十八日張又履來持示俞肇基府呈求改考並述慶太守之意
欲再訊一虛實以期無枉無縱告以鄙人業已訊明事關大
節豈能含糊具結如欲翻案即請太守主裁可也前日傳皋
蘭縣張筱山大令電制軍六十晉六誕辰微詩枕上作五言
長律五十韻

十九日俞肇基之認保石儒彥即其母之姪亦即其業師懸牌
斥革

二十日撰節孝額五通內張張氏楊楊氏二呈以男女同姓新
而未與

廿二日辰刻發落生童鎮番呂字號文童已懸牌改為僧生矣

今日病痊求補復以其冠敝踵決寒苦可知且鎮屬尚缺一額即允之今日本為郡城同官公燕以力辭又履送一席至署夜邀晴嵐興華中諸君共酌永昌縣黃子範大令饋駝絨縛一條秋風甚厲正需禦寒適又履同年亦餽一條兩君厚意若合符節深可感已又履餽贖甚重辭不獲命卻其半收其半

廿三日辰刻起程赴甯夏張又履同年送至大河驛夫站始別夜至靜邊驛宿晚卧寒甚非駝絨縛無以禦之良友之惠真同扶續已

廿四日平明咳哈發喘扶病登程古浪縣城內尖龍溝驛宿共行一百有五里在城見王大令以案首見遺有慰詞

廿五日咳哈仍不愈鎮羌堡尖岔口驛宿共行九十五里

廿六日武勝驛尖平番縣城內宿共行八十里

廿七日晨起咳嗽痰湧力疾登程行三十里至南大通驛宿自此而南即為進省通衢迤東北赴甯夏臨歧踟躕作半日留非云養病聊憇塵勞而已

廿八日日出而起喘稍平即登程出驛北門右轉登一小坡行萬山中山不甚峻最卑者僅如墩阜岡巒起伏綿亘不絕山麓皆平曠寬廣之處不及十畝隘處僅開方畧行十里大頭峴又二十里至茄子灣始見環堵曠野中前此無一間屋一縷炊烟也又五里石子井井在高阜繞阜三四家即一家檐下稍憩主人尚應童子試頗情潔淨一孩則蓬頭赤腳面上積垢如皴與村童無異也從此升降一高坡即出峽豁然開朗峽口兩崖陡出左山嘴有小廟三楹翼然高聳與右崖對

時遠望迎面一土岡橫亘如長隄岡麓有頽牆詢其地名小
盤子升坡又平地一層迎面土岡橫亘如前凡陟岡三層行
二十五里至五道峴據號房所開路程單過石井子十里為
包家寨又二里薛家鋪無人家將近峴亦皆土岡屢升屢降
約有五層此五道峴之所由名歟僭民居為行館主人李姓
號培華諸生也斗室僅可容膝紳耆接於堡外旋來投謁一
從九及廩膳生為之領袖午膳尚堪下箸數日以來始得一
飽

廿九日卯刻自東北行二十里甘露池

有兩道一進一出漫水難

一磚堡甚

完固土堡三四參差翼之通中頗有堡牆但皆空曠無人烟
自大通驛而東未見一樹至此始見一廢堡中有綠樹一株
枝條尚茂又行十餘里陟一土岡即入山山雖不甚高皆石

質紺碧相間蔚然深秀氣脈雖蜿蜒相接根皆中斷形如基
布共二十里至沙河井子尖地為紅水縣丞所轄劉貳尹秀
石自城一百二十里來迂見於行館飯後行五里雙墩子灘
又十里鎮魯堡繞堡而東山勢斷而復續所見石山漸少土
山漸多惟左首一嶺袤長遠望有蒼翠色山徑漸仄地皆沙
石人馬蹴踏有聲又十五里至黃崖子宿其地為兩崖口中
闢大道如門遠望峽口外野馬也塵埃也一白混沌杳然無
際仍借民房為行館主人田姓名占魁武孝廉度隴以來幾
於無人不言瘴不遇之廣南臺北而聞於隴右終在疑信之
間今日陟彼高岡猛烈香氣綢繆直透鼻觀即覺四肢茶然
渙然腠理皆開心骨俱醉有如中醒問子沂亦曾遇之間僕
輩皆言所經非一次今日黎明啟局早寒驟入覺氣利如翦

有頭痛者有氣喘者然則所聞為不虛矣何以前人傳記無一語及之

三十日黎明力疾起日出行出峽口即見羣峰高聳疊嶂迴環南山壁立如屏石骨刻峭不著寸土行五里彭家峽連北通紅水城出峽山勢益遒峻北面一山石壁深赤如霞標高揭山麓丹沙外溢取之即可傾筐二十五里至噍喇牌山徑稍寬勢亦平坦又三里福祿水一名窟窿水北山麓一澄潭其圓如鏡從者進一茗枕就樹陰稍憩詢其何所淪茗則云山北有人家又七里雄子營又五里紅拐子南北山勢至此欲合北山之麓有土牆一簇約一二十家南山深赤山口外亦有廢堡羣羊游於牆上又五里夢笈水清泉一道繞南山之麓汨汨而來上有林木人家皆依樹為屋過此漸入平曠北

山尚逶迤相接南山絕而復起但皆平鋪如几席略見坡陀而已十里鎮罕鋪其地為靖遠界並無夫馬支應亦無供帳炊薄粥一甌療飢僕役愜形於色無可句留即命速發行二十里度四五嶺至一條山行館見諸紳士慰勞之詢知靖遠縣城距此尚二百四十里鞭長莫及不來可恕其不達一僕事事諉之紳士則不可恕也

九月

初一日靖遠無一驛供差前站馬亦多逸者候車騎集辰初始發東北行二十里越邊牆而過又十里草窩類牆壁缺露立荒烟蔓草中又二十里青崖子尖上接靖遠下通中衛犬牙相錯入紅水界遠望一山如燈黛色葱籠可愛登其巔一土阜耳山麓紫砂涌出如以為陶器當不減陽羨壺也村民亦

經回却才遺不過三四家一鄉老伏謁道旁聞供帳亦按堡
料派敢言不擾民哉行館之後有一廢廟八風磚牆磨礪精
緻為隴上所僅見然鞠為茂草牆以內無一椽屋也飯後沿
山行十里八代水出山即望見一嶺橫亘如隄度嶺一層平
地一重凡越嶺十餘重行三十里至營盤水宿其地為中衛
縣界王大令樹栴遺僕三人迂客村前以溝為限地白如霜
蓋隸函也自青崖子東北未見一廬一畝一泉一木間遇駝
網逐隊鈴鐸郎當而已

初二日辰初始發由東北沿南山行皆草地二十里升坡為石
底梁磐石鋪地僅有頽垣一堵過此入一甬道土壁如牆約
半里許又涉草地輿中假寐但覺迂回升降日未卓午忽聞
已至甘塘子急褰帷視之則南山蜿蜒東趨盡曲如屏已橫

馬省蓋又行四十里矣行館即在山麓本為尖站因前站尚有八十里即駐宿

初三日卯刻發循南山麓東行十五里登一高坡為古山渠子又二十五里屢升屢降從高坡下望見山麓柏樹鬱蔥問其地為一挽泉平田中有土屋兩家軍門圭竇斗室泥牀淪茗稍憩即東行地瀕黃河一望皆平沙其深逾尺人馬蹴踏無聲左為高山四面沙阜圍繞五里四凹坑過此沙路復跡稍淺間以石屑兩崖草間土穴密如蜂房亦如海灘篙印疑為地鼠之所藏也又五里茶房廟二十里鄭家小河左邊沙阜蜿蜒如龍不斷沙坡下亦有樹本土屋一區若將就祀又五里道士窰微雨即霽兩崖沙陳如牆越一畝澤而北登高坡沙中皆赭石片亦有紅泥俯視草色縷綠綠樹成陰漸見山

坳中方界知有水泉人家將近矣凡五里下坡至長流水宿
初四日卯刻發仍由沙路東行十里孟家灣又十餘里山勢一
束羣峰驟合石壁崢嶸如怒猊渴驥蜿蜒奔赴山色淡黑亦
帶微赭碎石塞徑如斷甃如瓦甍頭多赭綠二色出峽即望
見黃河滔滔東下循河高下升降沙灘自孟家灣以下共二
十里至河干有屋三椽為停驂之所遙望對岸左為赤壁右
為沙坡剗然中分近視則中通一峽河流即出其間迅疾如
駛御人驅驢馬從沙坡上一徑羊腸高削千尋人皆登渡船
河流雖急風日澹沱波平如鏡放一筆手中流沿高坡而東
下約行五六里望見林木蔥蔚上有果園即維舟登岸岸壁
立無餘地臨水沙石膠黏隘不容足前扶後掖蹣跚而上至
行館中衛縣王晉卿大令樹柎來迎既見詢知為丙子同年

飯後仍沿河沙灘行碎石五色綠者如翡翠赤者如瑪瑙質
亦瑩潤更在涼州之上對岸山麓屋瓦鱗次炊烟縷縷自林
間出詢其地為炭窯蓋土人伐薪為炭於此屋盡類橋一道
自東直下疑為達橋行二十里過李旦橋左瀕黃渠渠水即
自河流引入其寬可以行船內有夾渠一道對面皆沙阜過
此綠陰成市村堡參差由李家莊行五里過鄭家寨劉家寨
又五里對岸沙阜漸低漸斷折而南過迎水橋橋之東左右
有二廟修繕方新丹堊未墜經王家莊又五里渡趙家橋仍
沿大河之濱以次經趙家莊李家夾道張家營子即進中街
縣城城東西相直約二里許間以二樓下為閘閘左右壁懸
額皆頌縣令德政者慶市駢闐道旁觀者如堵牆但民居湫
隘無廣廈以書院為行館有號舍有暖閣儼然試院工房五

樞亦軒啟王太令續所著古易費氏訂存十二卷爾雅郭注
佚存補訂二十卷廣雅補疏四卷天元單五卷歐洲族類源
流略五卷歐洲列國戰事本末二十二卷尚未刊畢在隄上
同官中固為巨擘北方之學者南皮以外亦未能或之先也
大令保定府
新城縣人

初五日卯刻出城東門自此而東村堡相接人家皆面渠開牖
支石為缸榆柳成行桑麻鋪荼頗有江鄉風景與長流水以
西荒寒之景不啻別一世界南北遠山環拱烟靄杳冥羣峰
皆在有無中道左皆平田田外有村有樹南面樹陰之隙即
望見河流如帶出城二里過五里墩西二里為汪家營子東
二里為呂家營子凡行十里至紅廟墩廟在路南距路北一
里餘有柔遠堡遠望樓堞高峻烟戶甚盛又十里范家高橋

橋橫渠上在平地並不高也橋東有綽楔上題萱榮松茂四字當是耆民百歲坊又五里朱家墩又五里鎮罕堡茶夫眩街屋三間畧憩片刻即行十五里海關墩夫土人呼為雷家沙窩子土屋兩椽亦臨街一炕一桌外無餘地背山而渠黃水繞階飯後沿山行巨石嵯峨不著寸土石色奇穠如丹漆中間一坡石子粉碎而兩旁皆盤陀石山嘴疊石為閘自此沿大河行五里為勝金關道北有短碣題表忠塔有兩小浮圖當是忠魂埋骨處行筵無書鄉民蠢如鹿豕無從得其姓氏矣又十里永興堡又五里賀家灣其地自北而東凡三折如之字又五里繞一山嘴從田塍行五里黃羊莊又五里餘丁渠從人請迂道遊石空寺喜而允之即折而北隔一渠橫略約而渡渠北左右雙阜上皆有小廟行山蹊間五里至寺

門寺在龍神廟之東經回亂已頽破惟門外戲樓新修尚完
整僧寮雖在梵唄寂然有高閣三層供毘盧佛片瓦尺椽無
存者惟殘龕尚留厓竇中閣後以山洞為佛殿寬若廣堂遠
如窟室陰森之氣慄人毛髮秉燭周覽中供金身一區左右
皆諸天羅漢凡三層上二層采蛭已剝落洞門有萬曆一碑
已斷裂摩挲其文字不能屬即出從腰上小徑行道旁又見
一小剎額曰永壽凡五里至宿站其地即曰石空寺行館對
一破剎今日共行九十里

初六日卯刻發東行渠上約半里許折而北趨斜徑秋稼登場
車馬馳驟阡陌間二里田家莊又三里廩家營予又東漸入
空曠地有砂磧有鹹灘惟左枕山麓右望田廬亦不遠中間
僅一片廣場非如長流水以西一望榛莽渺無厓際也又五

里宮橋又五里雍家墩又五里張義堡繞堡外北面過又五里施家營子又五里觀音廟廟在北山之麓土人呼曰新寺堂閣皆依山結構望之頗似古刹又五里棗園墩墩在大路相隔三四里又五里棗園堡從小路還達堡東堡後有龍神廟廟右又有殿宇皆極巍煥行館亦精潔飯後行十里白馬湖又十里過鐵通堡之後一廟新建正殿西嚮望見南廡有神像冠袍似宋時制度又十里古湖嘴亦稱瓜湖嘴遠山如屏正當馬首道北蜿蜒枕一沙阜阜下臨渠渠上僅有一綫地狹不容足繞阜曲折約一里餘渡一小石碕始得平地遙望渠外尚有大渠烟水渺然一碧又十里至渠口堡茶夫當沙阜低處有墩遙峙稍憩即行又五里李家溝沙阜漸低至欲盡處如鋪平地又五里沙口乃始不見沙阜又五里戴家

湖又五里十里碑一名火石碑上鑿下銳有如倒植在道之
左隔帷遙視惟見湖廣提督四字非古碑也時斜日在山忽
見雲氣一縷如白烟團簇扶埃壙而上征雷聲砰訇即自後
颿馳而至恐雨將至急曰車驅之車驅之努力行十里至廣
武城進南門天亦旋霽甯夏府所沐內巡捕府經歷余重賓
自郡來迂棗園堡有萬戶廣武有城郭有衙市儼然壯縣也
城西南隅有魁星閣高枕行館之左其東為牛頭山山下即
河流所經也

初七日卯刻仍由廣武南門出自北行里許即見道旁有兩墓
碑過此沿河一片荒灘五里至俞家墳康熙間湖廣提督俞
公之墓道也前有綽楔石羊石馬皆鵠列規制闕敞前臨大
河與牛頭山對峙當時卜此佳城必係非常吉壤今俞氏不

聞有後起者青島之不足憑亦可見矣自此行沙磧約十里地勢漸高迭連而升登其脊曰分水嶺有守弁汛房又有頽牆四圍舊為聖賢廟今鞠為茂草矣右為青銅峽左臨土阜自廣武至此蓋二十里云又廿里至大壩為甯朔縣界中衛界行五日又半至此始盡將至一土峽知甯朔縣事李瑞徵自郡城百餘里來遠迎見於行館行館門臨鐵渠直魁星閣右為龍王廟飯後行十五里過一小橋橋下即清渠渠北為陳奇堡又五里小壩茶夫紳耆出迎聞其地土語云大壩奔小壩越走越害怕則其路之迂遠可知實不止二十里也又五里退水橋二里張家牌坊題皓首完貞字在蔓草中岌岌欲傾又八里自陵皋堡過張家朱家包家閻家四寨于又五里至葉昇堡行館宿日將曠矣此地又為甯夏縣界知縣事

林壽鈞候於行館在省中本舊識談甚久今日共行八十里自廣武至大壩四十里無一村一舍

初八日卯刻北行過惠農渠七里鐵札橋又八里任春堡又五里王洪堡有惠農渠公所即設稅局於此一路曲折沿渠烟柳沙隄頗有水鄉風景至此導者云過渠有捷徑折而東堡後一大陂塘長隄一綫界乎中流過隄仍折而北十里姚家橋又五里王泰堡又五里楊和堡尖甯夏縣林大令候於行館甯夏鎮總兵湯詠山遣材官率馬隊二十人來迎飯後行五里大官橋二十里方家橋溝凡渠上小橋架木填土而築之平無階級與中假寐亦不覺其為橋也兩橋之間有薛家張家王家燒房三處即畿輔所謂燒錫也又五里王元橋過此沿唐渠行水皆拍岸柳陰之下有一葉小艇橫於岸側五

里沈家莊又五里楊家頭墩又五里李家寨子經紅花渠滿城距此十餘里又三里至南官廳望見白塔峯峭高峙城內西北隅總兵湯詠山理藩院郎中辦理家古事務全瑞甯夏道志崇知甯夏府事崇俊及夏朔兩令渠官四人教職八人五營將弁同迺於此在官廳略談即進南門至貢院試院規模視甘涼稍隘而結構頗精號舍無板攬即於前號桌之背起土一層為後號之坐寬不及尺

重九日辰刻謁廟文廟即在貢院之東謁 聖拜 闕坐班府學皆隨同行禮與甘州同歸後放告收節孝呈約二十通見各屬教官

十一日生歲試正場昨日有補二考生員甯夏鄭廷魁平羅王嘉猷止作一卷携二考卷出場今日飭補卷勒令再作王嘉

猷已投卷矣規避不到即縣牌拆革局門後傳鄭廷魁出號
領題周吁不應查號冊坐西霜字十號即命扶出視其卷則
是其人則甯朔附生徐殿驄也又從徐殿驄原坐之號查出
一人並非鄭廷魁正身即令默寫三代履歷瞠目無一字其
為頂替入場毫無疑義晴嵐諸人所詰之知為晉人在滿城
教讀本與徐殿驄不相識由鄭作介以四十金為之捉刀放
頭排時先將徐鄭懸牌褫革並札交提調官究辦及得收管
回文知其人姓張名有龍恐尚在子虛亡是之間也

十二日崇太守遣使來言槍手張有龍已枷示鄭罪魁徐年輕
尚堪造就請分別辦理自是持平之論允之

十三日各屬童正場點名時即拿獲槍替者二名一由康生舉
發一由考童舉發皆交提調懲辦

十五日出童生調復案窮搜冥索但非飛頭歧尾乳目臍口即皆入選可謂空谷之中見似人者而喜矣

十六日提復文童查出甯夏靈州平羅與正場筆跡不符者各一本靈州一本即西水字五號係補府考崇太守臨點時送進以為客籍而不知其捉刀人也荷校者累累在門鬼域之技罔知警懼實堪痛恨

十九日崧帥來咨中衛按府生官進朝以從軍得保知縣無故休賣髮妻奸佔難婦為妾又抑勒商民之女成婚荒謬至此教官若罔聞知謂之芻蕘可也

廿三日中衛一等優廩生張壽堂來謁壁其贊而見之告以此間士習耽敎文風僻陋局至省城肄業午刻赴滿城出南門過唐渠兩岸相距頗寬有木橋以渡橋下有神廟滿城在賀

蘭山東遠望如在山麓實則離山南數十里先拜色將軍繼拜成郡統皆談極久郡統江甯駐防以桑梓之誼甚殷勤歸後全部院崇太守先後來未見志觀察薄暮來久談同城文武皆以羊裘為餽遺所謂灘皮統也輕暖無比每裘重不踰三斤諸君以土產而訂不可辭共收袍袂各五襲又自置一襲朔縣李大令餽贐百金卻之又有餽賀蘭山石硯者次於端院

廿四日辰刻發試院出南薰門文武員弁同送於郭外諸生繼之志觀察餽贐五十金卻之四十里楊和鋪尖知夏朔兩縣已先至宿站時日已加午飯後即趨行日暮離葉昇堡尚十餘里天暝不辨塗徑林李兩君遣民勇持燈來迓黃昏始到夜飯後與兩君秉燭久談李大令尚欲送至大壩堅卻始允

遇惠農渠水平拍岸城內外行潦縱橫蓋甯郡以渠為利民
皆遇防蓄水潦則以鄰國為壑溝洫不通久矣近日湯毒吾
捐廉撥勇開濬洵為便民之政

廿五日天未明即起卯刻發小壩茶尖大壩飯尖日晡抵廣武
營宿

廿六日辰刻發廣武營來時自石空寺起程尖於棗園宿於廣
武此次因至石空後即南折渡河住宿安堡計程一百三十
里併日而行尋短道達今日改宿棗園堡所行非舊道村隴
間積水泛溢二十里至渠口鎮即望見沙岡橫亘來時途出
岡之東相距尚數里今日沿岡麓行始知岡下即大渠以岡
為障出村口渡一小橋從沙峽中上高岡行二十里至鐵通
堡茶尖又行二十里出沙岡仍從阡陌間曲折里許即至棗

圍壁時已過午幕中諸君車行繞山麓尚未至也

廿七日辰刻始起臨發王靜卿大令求見言廣武城一帶稻晚
穫損於霜灾靖遠及平遠境又有碩鼠為害兵兆也曲突徙
薪語長心重咨嗟而別北風甚厲輿中寒甚行四十里至石
空寺尖來時行村落間今迂道避水繞行山麓距石空約一
里餘有破剝土人稱為小寺從土山之麓甃磚為基極鞏固
左右拾級而上遠望如崇臺兀峙緣以周垣其中但有土壁
殿宇似已傾頽殿後枕山腹鑿石崖為龕佛象累累丹雘纓
絡尚可望見飯後即折而南五里至田家灘僅有渡船六七
艘前驅爭濟僅存兩艘泊岸邊即鼓棹南渡下水駛甚速約
六七里頃刻即達彼岸十里康家灘渡黃渠無橋梁一敗舟
泊中流兩岸以繩曳之繩爛復接續之竭蹶以渡即至行館

僕輩一行李車在堡外覆於黃渠行囊盡溼幕中諸君子以
待船薄暮始到望眼穿矣甯安堡產枸杞其上者曰頂丸其
次者曰魁元在甯郡聞棗園為上乘至此始知猶為第三號
園物之不齊亦黎邱炫人之技也

廿八日辰刻發甯安堡出堡行里許過一渠渠甚廣而黃流將
涸沙灘淺露石橋木欄橋南北堦甃磚為門西來所僅見也
五里新鋪又過一黃渠渠僅寬一丈餘而水深流急滔滔東
駛自出甯安堡溝塍綺錯中田有廬過渠而南則曠野平蕪
渺無人烟矣又五里漸入山峽從葦密中曲折得平地間有
土阜當道中開一峽以通車騎二十里野豬溝僅有土壁周
遭頗似廢壘又十里長山頭尖亦祇有土屋三椽以為停驂
之所廣庭左右皆土窟從者休息於此飯後出行館自高坡

下即渡一小河其河灘皆沙礫據云味鹹不可飲山勢漸開
四圍遠合行二十里至馬蓮井子茶尖亦名陳馬井有土屋
二十餘家北頭有小廟又二十里至大洪溝宿溝之東約二
里有馬家河衛宇相望有釐金局甯靈廳方仰政自廳城二
百餘里遠來還於行館云此間至黑城子三站二百餘里皆
回民夜館人燐熱炕急命撤薪暖氣已透重衾矣熏灼不能
眠呼奴子起易以木榻又為蜚蟲所苦擾擾終宵

廿九日辰刻發上道後所行皆平地左右遠山環抱二十里湯
房又十里史巴頭從高坡下回民十餘家零星散布又二十
里楊家塘又七里丁家塘土屋整齊駝羣遊於野此間回
民富者畜駝運鹽為生貧者為之司羈勒又五里李家岡
子僅莊院兩家又五里楊家河灣過此為平遠界當路一土

山穿峽甚深邃下坡一河前橫與夫釋蹻亂流以渡上岸不
數武又穿一土峽出峽平遠縣王家彥自城百六十里遠來
過於峽口自渡河約行三里至同心城皆回民頗稠密行館
在城內

十月

初一日卯刻發今日所行皆高原其平如砥一望無垠詩傳高
平曰原又云廣平曰原余謂必兼高廣二義其意始備原上
亦間有壟熟之田兩原中分之處有如裂縫中有土峽前原
從峽而下後原從峽而上五里紅溝城又五里甘溝有流泉
一道人家夾澗而居又十里十字路又十里高厓子尖入海
城界人家皆在崖下飯後行十里李家積坎又五里土橋灣
又五里自高家灣至馬家灣茶尖又二十里穆家園莊自莊

西北回民稠密村堡絡繹間其名曰九百戶八百戶七百戶
五百戶官道兩旁所見每莊至多一二十戶而已其屋多在
土堡中有似覆瓦當形遠望之亦如車箱又十里望見土山
當道即所謂李旺堡堡在土山頂下坡入土峽再升坡盤旋
山麓良久始達行館山下有一河河灘皆鹹地白如霜對岸
山麓亦有村落屬平遠界署海城縣事袁範自城百五十里
來迂諉極久行館甚湫隘上漏旁穿周圍張布幕風自隙中
來陰寒砭骨

初二日辰刻發行五里大河灣過此為固原州界又五里杜家
溝十里鹹樹灣茶尖又十里八營村居皆在高坡之麓自坡
而下行五里閻家溝今日所行多溝道兩旁土壁之上皆高
原也厓隙切平有如甬道而閻溝尤深邃又五里七營尖署

固原州事宋之章自城來逢董帥寄語願見允明日往飯後
行十三里馬家灣二里閻家崗子五里十里墩蓋距黑城子
宿站十里也過墩二里平路溝三里余家灣五里至黑城子
行館土城頗廣闊西北邊杳無人烟

初三日董星五宮保罷官後寓戚家堡距黑城五里辰刻輕騎
往沿途所見精壯勇丁絡繹不絕將至半里許要路左右兩
小土圍一大土堡在其後左枕高山至堡門但見健兒持白
蟻桿子蜂擁而來見從騎寥寥皆趑趄而退既見絕無寒曠
即自陳無異志大帥何以見疑氣湧如山忿忿不平之氣形
於詞色其語操土音十不傳二三一幕府鄂人為之傳譯臨
別贈言諷以逃禪從岔路入大道隘口有土堡甚堅國防兵
零星四五倚壁門瞭望董帥即遣弁賣帖送於此至平塘墩

離黑城子十五里矣五里趙家市又五里三營茶尖又五里八潦灣又五里渡張家河又五里至楊老莊宿今日共行四十里本為尖站行館甚逼窄臥室陰寒重衾如鐵

初四日辰刻發行五里陳凹凹又五里東子河十里頭營五里劉家堡又五里石橋子十里沈家河茶尖河之東有馬家園莊五里平涼營但有墩臺絕無居戶三里長城子二里靈臺營人家皆枕山起屋土舍高低掩映山麓五里飲馬河過河鄧錦亭軍門宋刺史皆見於官廳進東門至行館

初五日辰刻出南門流泉四山交注縱橫如織架支片板以渡十里一鋪二十里鋪有土屋十餘家過此兩峯漸合逵徑崎嶇曲折升降坡陀五里遇回民禮拜寺在東山之麓又五里程家灣出山峽羣山之中有廣陌豁然平曠折而西南路漸

狹又五里山河店于西山麓土屋參差羣羊斂草山谷間又
五里開常嶺尖行館在嶺下飯後山行五里為白頭口出口
沿山麓行五里青石嘴紫色如沐蔥秀可愛自此大路至牛
營二十里今過青峽河從小路行僅十里河水從六盤山後
發源涓涓細流注村落間渡河行萬山中一綫羊腸不通車
轍行旅往來頗攘攘想係捷徑故羣趨之曲折登一高嶺下
嶺卽至牛營停輿稍憩趨大路行五里水泉于又五里大灣
又五里楊家磨各有土屋十餘家流泉繞舍風景幽寂又行
五里至瓦亭驛宿有土城在六盤山東麓由涇州而西達蘭
州此為大道距來時宿此已五月餘矣

初六日辰刻登程自瓦亭而東卽為到甘所經之路羣嵐環拱
一澗中分飛瀑潺潺寒林蕭瑟絕好雲林子畫幅覺前度來

時領略尚有未盡山路愈行愈窄如芭蕉葉捲層層迴合十五里至三關口兩崖陡合僅通一隙峽口有關帝廟登殿瞻禮又五里蒿店三十里至安國鎮尖自鎮以西山高風急地氣早寒木葉盡脫至此則轉綠迴黃柔條婀娜老去徐娘猶存嫵媚與中寒氣亦稍釋即脫一裘飯後行四十里至平涼府進城至貢院先見常觀察程孫二將府州縣瑞履宋高四君同見

初七日循例謁廟講書回署放告

初九日平固兩屬生員正場平涼縣生李懷清經同考生舉發非正身即札交提調訊辦本生懸牌褫革

十三日發童生調覆案平遠進額五名祇有五人應考縣首無一語通順祇能含糊從寬闕無濫之例僅調四名既發案平

遠教官以提調命來緩頰云五人中惟此為回童回人讀書者絕少未可以工拙論可否破格錄取以資鼓勵不得已允之

十八日已刻出城東關過清平橋常觀察瑞太守羅太守宋刺史程副將孫游擊送於官廳諸生及防營繼之四十里鋪尖三十里白水驛至行館

十九日辰刻發四十里王村尖午後三十里至涇州未至五里涇水滌洄流阡陌間滯碍不前前驅導登高坡沿山麓行宿試院

二十日今日宿瓦雲驛僅五十里已初始發由東關升坡十里上高原高處兩崖積雪尚未銷道路泥濘未正始達行館廿一日已初發十里將軍鋪一名樊家莊五里窰店自出平涼

城至此皆自秦上隴舊道從窰店東門折而北約五里□家
莊自昨日升坡所行皆在廣原之上其高與崇山等道左右
拆裂處即為深壑俯視千仞土壁削立森森如劍戟至此道
東有深壑遠望羣崖高下錯次如冢如阜皆隴阪也輿曲折
沿其麓如行井幹之上自上神盤逶迤下坡至下神盤共十
里居民數十家多陶穴又北行漸趨而下共五里至一陡坡
不能直下盤旋詰屈儼如轆轤兩面皆土牆車立凡數十折
始豁然開朗其地曰湯驥猶未至平地也為陝之長武甘之
涇州甯州交界兩省三屬犬牙相錯過此則為甯州界矣崖
之東有周公祠當是官斯土歿而祭於社者僅小屋一椽而
已高處又有兩小廟停輿略憩下坡即為涇河之濱以牛車
渡河水雖深其流平緩不如黑水之迅急過河即為北原與

南原兀然並峙涇水出兩原之間渡河行五里達賈家門坡為登北原之孔道高坡陡絕上數十步兩崖遽裂中通甬道如梁橫互平直如砥由梁而北復升陡坡漸行漸高七里始達高原之頂田疇彌望使非從高坡升幾疑其為平陸也過深壑兩三處皆橢長而不甚廣其長者幾及一里餘又六里有却舍曰荀家莊又七里至太常鎮行館

廿二日今日途長寅刻即起秉燭盥洗晨餐畢即登輿東方甫白行五里廣家莊又五里仇家寨子曉旭始升又五里洪家寨又五里黃溝泉又五里長官樓子過麻社溝至西溝共十里又五里三不同尖其地為甯州安化董志三屬交界飯後由大小兩寨于十里至張家莊又五里錦雞嶺又五里自李家堡至米旺堡又五里鏡家嶺又五里董志縣城署安化縣

事徐永興自縣城來逕進南門額曰延薰至慶新書院茶尖
即由北門出五里王瓜寨子又五里折而西二里八里寨又
六里秦馬嶺今日所經三嶺皆平地略見穹窿不覺其為登
陟也又二里至西豐鎮宿適逢市集環而觀者如堵塙慶郡
著名瘠苦而所過之地人烟雖不甚稠密數里之內輒有村
堡較之西路彌望皆砂磧鹹鹵以遠過之而官斯土者皆以
彼為樂郊此為畏途殆高原硤瘠地利有未興歟據云回匪
亂後土著稀少占籍耕種者皆客民也途中作五古七絕各
一首

廿三日辰刻發十里烟氣均又三里李家市又七里何家莊又
八里張家坳謂之坳者其地皆在深壑之麓村舍環列折旋
如半球形又七里高家市又五里驛馬關尖飯後行十五里

夏家潦池所經高原居民多掘地為坎蓄水供飲其濁如漿
所謂窖水也又十里苗家嶺子又十里白馬鋪行館舊為防
營院西下坡有陶穴館人居此徐大令以卸篆在即求速藏
事允明日到即謁廟

廿四日卯刻發市北有金神祠又有白馬天神廟皆祇瓦屋一
楹十里三家店地勢漸趨而下又十里雷家坳子又十里樊
家寨子人烟闐寂皆祇土屋兩三家間有窑洞而已通旁見
兩碑並立上橫石額題垂芳百世四字又一碑石柱聯云一
片苦心口舊緒千秋古碣動新思當是節孝及頌德政之碑
也過此平原漸盡道左皆深壑稍行而北右所亦羣崖闕缺
連下三四坡皆絕陡每一坡兩旁輒有土壁障之泉水涓涓
自崖中出澗底有石卵澗壁亦露石質作澹青色曲折徧澗

拾級而下共行十里至十里鋪兩崖斷處與馬皆從石橋渡過橋面寬平如砥有健石填土以為基者有空其中者亦有琢石為欄者共四五處又二里由趙子溝至金公橋三里渡西河嶺于下嶺即為官廳慶陽府慶霖與徐大令教職同遊於此又三里遇西河河頗廣木橋狹而長過橋二里升高坡即達慶陽城城依山為堞極高峻南門以形家言塞而不啟由小南門入至試院其西為城隍廟東為鵞池堂下有黃山谷雲亭宴集詩舊得其拓本而不知其石在此也未刻謁廟在南門內與府署密通

廿七日童正場甯州童生尚步瀛經派保南宗周指出非正身并認保王炳南交提調訊辦又有張從新唱保不符呵而詰之失色遽退補點亦未到蓋亦為漏網之魚也此間生童稀

姓有道且俄脫先晚皆不經見平涼有台司當是複姓固原有雅平遠有拓并附記之

廿八日暮慶太守來呈供詞搶替人王連靖遠人請從寬典枷示三日本童及廩保釋勿問此間官吏皆以姑息為愛士風骯骯一至於此雖允之問心滋愧已

十一月

初三日科試生正場合水曹廣文監場與論士子之瘠苦既無以體恤之何能整頓愧疚交集至夜耿耿不寐

初四日出生一等素府學和卿僅薦三本披砂檢磔又得兩本而歲致之八人到六人皆賸乎在後不勝疑詫因取歲試卷核對文理皆不甚符而增生王承德歲第一廩生盧脫穎第二卷筆迹亦迥非一手顯有換卷情弊不自愛至此萬難姑息

即懸牌降為附生歲試卷降二等末科試卷降三等末念其
痛苦聊示薄懲而已

初五日簿幕慶太守來為降康盧脫穎額從寬典允待來年自
到甘省按試八棚始知州縣有濫革生員之權學政則不能
辦一人也何以言之每一月詳革生員之牘多則四五少亦
二三閱其詞雖舉陶復生無從矜宥批准之後亦無有為之
求復者即求國有常憲使者不能為解網也按臨所到輒則
違犯場規重則匿喪槍替朝革夕求州縣求之提調求之甚
至鎮道亦求之自愧不能破除情面十人之中貸者八九其
實州縣為整頓地方起見學政雖無民社責同舟共濟不能
不體諒之學政為整頓學校起見州縣通從而掣肘根莠不
除嘉禾不生到此半年毫末未能整頓內疚寸心外慙師友

此後尚望僚友之諒我也

初六日辰刻發落諸生畢謁韓范二公祠在南門城隍廟之左
僅饗堂三間兵燹後門廡皆未建府署之二門屋梁有宋熙
甯范忠宣題字府縣皆拓以為贈賸以山谷雲亭宴集詩度
隴未得一石聊以解嘲而已日晡獨游鵞池郡城地高其地
在甕城之內拾級而下約十餘層穿一甕洞甚深遠兩牆皆
甕以碎石出洞復歷二十餘級有關侯廟略瞻仰又下十餘
級為葉王廟廟左有文昌閣前有一亭可憩息中柱吾鄉邦
上陳閣一聯云三至鳳城游對面青山應識我千年鵞洞在
無心流水到何時亭外皆磚欄中空如井憑欄下望有石級
數十層絕陡且無檻楯中又有一甕洞出洞再趨而下即出
城闌一水如帶環城下注即所謂西河也西河與東河兩源

會於城下同入于涇對岸高阜有不密墓暮色蒼然朔風砭骨不能久留歸即赴府署賓主四人暢飲至深昏始歸劉游戎云鶯池舊有一井大旱不涸望之下有兩鶯游泳水面若隱若見並無鴝鵒之聲今井已涇矣予沂云今日游八仙廟聞之土民云廟有木瓜樹每遇學使按臨之歲結實若干即為郡人士預兆無不驗者此亦齊諧之類也

初七日已刻起馬出小南門二里東河渡金公橋自河濱折而西當道一竇洞額題覺照寺未見一椽惟遠望南山之上有佛剎浮圖矗立未知即此寺否登坡共行二十里上北原登隄十里始至平地為雷家峴茶尖又二十里至白馬鋪宿作五律一首

初八日辰刻發行四十里義馬關尖午後又行四十里至西豐

鎮宿為寒氣所中骨蒸形寒驟然大病

初九日天未明扶病起二十里至董志縣城慶興書院茶尖又三十里至三不同失飯後行四十里至太常鎮宿寒熱交戰重食不溫呻吟達旦

初十日辰刻扶病登程下北原升南原共七十里始達瓦雲驛十一日早起倦極舉步維艱力疾登程先屬晴嵐告城中文武無出進行六十里竟達南關試院稍憩始見張筱山刺史此間試院倚山麓唯幕友房在宅門內此外書差廚皂皆在堂階以下號舍在大堂之北另開小門以通出入門外一小屋即為差役所棲宿號舍短牆之內即係科房雖坐堂皇無從覺察此誠天造地設一方便之門不知當時締構何以若此十二日兩日僅餐雙弓未早起倦極已刻謁廟拜跪幾不能成

禮甚矣吾哀也歸後循例故告見各屬教官共五人張刺史
為生童乞恩欲給燭告以功令不可違不得已子刻即點名
吾鄉謂之倒給燭此通融辦法也

十六日政務處來咨文費到中外保舉經濟特科單老友如禮
卿季直仲容蘇庵後起如章式之胡燏之王君九皆在其列
蔚若佩鶴未舉一人與鄙人有同心也

十七日皖撫聶仲芳中丞咨到題名錄一本蘇府共二十四名
常熟脫科吾生以來所未有也第鄉之長子君九佩鶴之幼
子希實此懷之子子始至獲雋追念亡兒潸然墮涕

二十日新進文童總覆聞夏通甫在此時候至夜半考童尚未
齊集懸牌免試此場雖屬其文令典所關豈可弁髦等視遇
午即嚴催至日暮始升堂給卷在此間已為僅有之事矣此

間生童多脫姓又有口伍杏及蘆姓皆稀見

廿二日辰刻起馬進涇州南門出北門生童送於道左文武送予回山下官廳三度到此未登王母宮瞻眺不免山靈騰笑已三十里至王村尖又四十里白水驛宿平涼縣高大令冒雪遠來一見即憊勞之途次積雪皎然四山一白幸通衢車馬往來土性鬆浮輪蹄所展雪即融而滲下行路尚不甚崎嶇

廿三日辰刻力疾行今日七十里至平涼四十里鋪尖午後積雪微融途泥滑遽行過王家寨及清平橋進城至貢院昨臥後轉展不得寐今日倦極四肢懈弛有如癱瘓到省尚有十日程且有六盤山中道嶺之阻奈何

廿四日卯刻發四十里安國鎮尖飯後行五十里瓦亭宿三度

到此矣至行館同鄉硝河廳徐菊仙別駕以桑梓之誼自固
原州來云宋刺史病屬代送客即留共晚餐肴有酸辣湯與
別駕縱談鄉曲忘其何味不覺呬兩口夜乾噲

廿五日辰刻發約十餘里登六盤山至關侯廟茶尖又上兩盤
始登絕頂至隄干鎮鑰坊下官店隆德縣秦大令自城來迓
以後湯鄭重以進云此藥真本山產可以禦寒誤為筍湯不
覺呬其半因詢六盤山向未聞產筍大令大笑云卑職遼人
也此土產耳始悟為參已下咽矣昨日呬醋今日飲參可謂
傷風痰飲對症發藥略談即下山今日共行五十里進隆德
縣城宿行館

廿六日辰刻發行四十五里至神嶺鋪尖飯後又行四十里至
靜甯州進城至行館

廿七日辰刻發今日本當宿青家峽前度經此行館湫隘土室陰森冬寒不堪棲止行四十五里至高家堡改尖為宿今日所行皆高隴登降土坂幾及六盤山之半日落後室中凜冽兩火爐紅缺熾然無暖氣形寒如卧冰窖睡後頭脹筋脈轉側不安

廿八日卯刻力疾登程土山峭崿道阻且長行四十五里至青家峽尖飯後又行四十五里升降兩高坡在太平店茶尖翟家所宿

廿九日辰刻發所經皆土峽每下一高坡即有一澗澗上必有一橋凡渡三四橋連張城鋪茶尖過此行兩山間高峰壁立山下不見日光冰雪皆未化共行四十五里至會甯縣進城至枝陽書院宿

三十日辰刻發行六十里至西華驛宿行館燈下在土炕假寐
為寒痺所中先覺心蕩繼以頭暈天旋地轉不能起立昨適
服薑附一劑初以為葯性燥烈飛揚外越繼知予所病大同
潘謝兩君亦頭暈始知地氣使然非葯誤也

十二月

初一日辰刻力疾登程行六十里過清涼山至安定縣進城至
行館鴻齋同年供張甚盛夜復饒狐裘四襲受其丰

初二日今日共一百十里寅刻即起登程尚未辨色約行十里
曉旭始東升六十里至橋鈎驛尖行館北牆陰寒居者輒病
故不敢宿飯後登車道嶺高聳雲表五十里至甘草店宿

初三日辰刻發二十里至清水驛茶尖四十里至金家厓行館
初四日早發行二十里響水子茶尖又二十里東岡鎮尖又二

十里至省城歸署與室人相見病半年矣始有轉機支離卧榻相對淒然僕輩來言何方伯為言官所劾波及首縣鎮番縣鄭大令平遠縣秦大令劉讓木刺史楊鼎臣太守交松帥查辦僕遇隆德時秦大令以平遠瘠苦視為畏途言者稱以三千金得之寃矣

廿四日靜遠令劉文海饋鴿子魚雞入大水為蜃為入大水為蛤見于經典此魚為鴿子所化唯靜遠界黃河中有之又黃魚出青海中隴市海錯惟此一品山雞肥而賤青銅三百即可買一雙前日劉讓木餽兩鷺云土人食者少不以為珍味廿八日新保經濟特科政務處咨到第二次清單陸續連日本擬舉曹剛甫王雪澄應詔令不敢以此辱二君矣

廿九日蘭州果品以爛梨為第一今日市兩枚以冰糖熬之其

味甘酸略如外國香餅酒可銷煤毒夜聞奴子因乾饑之愁
諠呶不已鄰人館富民家感暑庖人以臭餒進不敢露之聲
色畧減半餐須臾居停入縷迷晉豫游飢穢殍載道庚申浩
劫并日而餐言畢勃然變色拂袖而去余亦竟未有以反唇
其後在校邠師齋盤中首宿朝日聞干先生每舉惡衣惡食
章以諷亦未敢質難至今思之殆所養之不如已

三十日以遲暮之年作他鄉之職惻獨餘生百感交集前在弱
水銀川檢歸五色石子一囊今日以朱提一兩購瓷盃一擇
其質地瑩潤者儲水養之文采斑斕足供清玩室人不忘土
風以兩銀鏤壓歲余謂此纍纍者真我歲寒之交不愈於阿
堵物乎

緣督廬日記抄卷十

女夫王立勛謹繕印

邑後學潘承明謹校

錄督慶日記抄第十冊校勘表

葉次	行次	格次	誤	正	葉次	行次	格次	誤	正
二	十八	七	招	始	三十三	十四	二十	製	犁
六	七	八	毫	色	三十六	九	五	深	潭
七	六	十八	大	木	三十八	九	六	開	(脫出字)
十	十六	二	道	(衍文)	五十九	二十一	十一	子	井
又	十二	九	日	目	六十九	三	四	五	部院
十一	十一	二十四	(空格)	處佳	七十七	三	二十四	渡	度
十三	二十三	二十四	鹽	鹽	又	十三	十九	是	當是複姓
十四	十四	二十一	(脫至字)	(添至字)					(衍文)
五十二	十五	二十三	卯	卯					
又	十九	九	坡	(衍文)					